

**GRAWNG TAX SAW LUX  
MAI  
LAI MHAI NAWH**

**ဦးစောလု အတ္ထုပ္ပတ္တိ နှင့် မှတ်တမ်း**



Written By  
**Ai Nap Tao (Sgu)**  
B.Th., M.Div.

**ဦးစောလု၏ အတ္ထုပ္ပတ္တိအကျဉ်း**



ဦးစောလုသည် ၁၉၄၄ ခုနှစ်၊ အောက်တိုဘာလ ၁၅ရက်နေ့၌ ခူးတဲ့ ကျေးရွာ၊ မိုင်းယန်းမြို့နယ်တွင် မွေးဖွားခဲ့သည်။ မိဘများမှာ အဘဦးကျော်ရန်း အမိ ဒေါ်ဂိုဟော့၏ သားဖြစ်ပြီး၊ မွေးချင်း(၆)ဦး အနက် အကြီးဆုံး သောသား ဖြစ်သည်။ ၁၉၆၅ ခုနှစ်၊ ဇွန်လ(၁)ရက်နေ့ တွင် ဒေါ်မေရီနှင့် အိမ်ထောင် ပြုခဲ့ပြီး သားသမီး (၁)ဦးထွန်းကား သည်အပြင် မွေးစားသားတစ်ဦးရှိသည်။

၁၉၆၆ ခုနှစ်တွင် ပန်ပိုင်မြို့၌ အစိုးရမူလတန်းကျောင်းအုပ်အဖြစ် သော်လည်းကောင်း၊ ၁၉၆၉-၁၉၇၃ ခုနှစ်တွင် ပန်ပိုင်ကာကွယ်ရေး ခေါင်းဆောင် အဖြစ်သော်လည်းကောင်း၊ ၁၉၆၇-၁၉၉၂ ခုနှစ်တွင် မြန်မာ နိုင်ငံ 'ဝ' ယဉ်ကျေးမှုကော်မတီ၏ ဥက္ကဋ္ဌ အဖြစ် သော်လည်းကောင်း၊ ၁၉၇၄-၁၉၈၈ ခုနှစ်တွင် ပန်ပိုင်မြို့နယ် ကုန်စည်ဖြန့်ဖြူးရေးကော်မတီ ဥက္ကဋ္ဌအဖြစ် သော်လည်းကောင်း၊ ၁၉၇၄-၁၉၇၆ ၊ လားရှိုးမြို့နယ်တွင်(၁)တွင် ပြည်သူ့ ကောင်စီဝင်အဖြစ် သော်လည်းကောင်း၊ ၁၉၇၆-၁၉၈၈ခုနှစ်တွင် (၁၂)နှစ် တိုင်တိုင် ပန်ပိုင်မြို့နယ် ရှမ်းပြည်နယ်ပြည်သူ့ ကောင်စီဝင်အဖြစ်သော် လည်းကောင်း၊ ၁၉၇၅-၁၉၈၈ ခုနှစ်တွင် မြန်မာ့ ဆိုရှယ်လစ်လမ်းစဉ် ပါတီ တင်းပြည်ပါတီဝင်အဖြစ်သော်လည်းကောင်း၊ ၁၉၈၉ခုနှစ်တွင် 'ဝ'အမျိုးသား ဖွံ့ဖြိုးတိုးတက်ရေးပါတီနှင့် လားဟူအမျိုးသားဖွံ့ဖြိုး တိုးတက်ရေးပါတီကို တည်ထောင်ပြီး အထောက်အကူပြု ဦးဆောင် နာယက တာဝန်ကို ယူခဲ့သည်။

၁၉၉၃-၁၉၉၄ ခုနှစ်တွင် 'ဝ'သွေးစည်းညီညွတ်ရေးပါတီ (U.W.S.P) နှင့် 'ဝ'သွေးစည်း ညီညွတ်ရေးတပ်မတော် (U.W.S.A)တွင် ပြင်ဆက်ဆံရေး ဌာနကြီး၌ အဖွဲ့ဝင်အဖြစ်သော်လည်းကောင်း၊ ၁၉၉၅-၂၀၁၂ ခုနှစ်တွင် (U.W.S.P) နှင့် (U.W.S.A) ၏ ဗဟိုနိုင်ငံရေး အတိုင်အပင်ခံ အဖွဲ့ဝင် (ကျိန်ရှက် (တရုတ်စကား)Ceung Shieh ) အဖြစ် သော်လည်းကောင်း၊ ၂၀၁၀ ခုနှစ်တွင် လားဟူအမျိုးသားဖွံ့ဖြိုး တိုးတက်ရေး ပါတီကို ထပ်မံတည်ထောင်ပြီး ယခုထက်တိုင် ဦးဆောင်နာယက တာဝန်ကိုယူခဲ့ပါသည်။

ဝမ်းဝမ်း ပုံနှိပ်လုပ်ငန်း  
ဗဟိုစီးသတ်ရှေ့ လမ်းမတော်လမ်း၊ လားရှိုးမြို့၊  
၀၈၂-၂၅၇၈၅



Yam Yuh Kaing Daux Meung Vax

“ဝ” နယ်၌ UWSP နှင့် UWSA တွင် ပြင်ပဆက်ဆံရေးဌာနကြီး၌  
အဖွဲ့ဝင်အဖြစ်တာဝန်ထမ်းဆောင်စဉ်



Sara Tax Ciet Rong + Yax Yox Hawx  
ဆရာ ဦးကျက်ရန်း + ဒေါ်ဝိုဟော့

Kawn Simex Kawn Sibon  
Sara Tax Ciet Rong + Yax Yox Hawx (6) Kaux  
ဆရာ ဦးကျက်ရန်း + ဒေါ်ဝိုဟော့ တို့၏ သားသမီး (၆) ဦး



Tax Saw Lux, Yax Ruthax, Tax Yaw Bax, Yax Rosi, Yax Rudi, Tax Yawnax San  
ဦးစောလု၊ ဒေါ်ရုထ၊ ဦးရောဘတ်၊ ဒေါ်ရိုစီ၊ ဒေါ်ရုဒီ၊ ဦးယောနဆန်



Tax Saw Lux Mai Yax Meri  
ဦးစောလု နှင့် ဒေါ်မေရီ



Nyiexma Tax Log Yawn (Kheue) + Yax Dina (Kawn Sibon)  
သမက် ဦးလုပ်ယွန်း + သမီး ဒေါ်ဒီးနာ မိသားစု



Nyiexma Tax Yawtax (Kawn Simex)+ Yax I Sin Tao (Mon)  
သား ဦးယောသင်+ချွေးမ ဒေါ်အိဆင်းတောင်း မိသားစု




Nyiexma Tax Awstalux (Kawn Simex)+ Yax Shie Li (Mon)  
သား ဦးအော်စတာလု+ချွေးမ ဒေါ်ရှယ်လီ မိသားစု



Nyiexma Tax Sam Meung (Kheue) + Yax Di Me (Kawn Sibon)  
သမက် ဦးဆမ်မိန်း+သမီး ဒေါ်ဒီးမေ မိသားစု



Nyiexma Tax Nyi Kat (Kheue) + Yax Di Se (Kawn Sibon)  
သမက် ဦးညိုကတ် + သမီး ဒေါ်ဒီးစေ မိသားစု



Nyiexma Tax Teng Thoe U (Kheue) + Yax Di Le (Kawn Sibon)  
သမက် ဦးသိန်းထွေးဦး + သမီး ဒေါ်ဒီးလေ မိသားစု



Nyiexma Tax Yawnax Awng (Kheue) + Yax Di Yi (Kawn Sibon)  
သမက် ဦးယောနအောင် + သမီး ဒေါ်ဒီးရီ မိသားစု



Nyiexma Tax Yawnax Lux (*Kawn Simex*) + Yax Yex Meung (*Mon*)  
 သား ဦးယောနလု + ချွေးမ ဒေါ်ယေဝိန်း မိသားစု



Nyiexma Sara Joseph (*Kawn Priex Kawn Eei*) + Saramax Ok Lu (*Mon*)  
 မွေးစားသား ဆရာ ဂျိုးဇက် + ချွေးမ ဆရာမ အုတ်လူး မိသားစု

**GRAWNG TAX SAW LUX  
 MAI  
 LAI MHAI NAWH**

**Simin                      Grawhgrawng                      Plak Lai**  
 - **Lox Jah**

**Lawg (1)**

**YAM NYAWM JU TAX SAW LUX MAI  
 NYIEXMA NAWH**

- |  |   |
|--|---|
| 1. Yam Tax Saw Lux Ot Cawng -----        | 1 |
| 2. Grawhgrawng Yuh Kaing Acuyax -----    | 3 |
| 3. Grawng Lih Mawh Cao Kaing Kakoije --- | 4 |
| 4. Nyiexma Tax Saw Lux -----             | 5 |

**Lawg (2)**

**TAX SAW LUX MAI KAKOIYE**

- |   |    |
|---|----|
| 1. Sao Hing Kakoije -----                 | 7  |
| 2. Yaong Brex Kakoije -----               | 9  |
| 3. Yaong Ru Kakoije -----                 | 9  |
| 4. Grawng Laig Ba Ka Pa Haktiex Vax ----- | 11 |

**Lawg (3)**

**TAX SAW LUX MAI BEENLI KAWN  
 KHRIT**

- |   |    |
|---|----|
| 1. Nyiex Kawndoe Vax -----                                | 14 |
| 2. Loe Num Loe Yieh (3/300) Satsana<br>Loi Sam Ngam ----- | 24 |

|  |           |
|--|-----------|
| K. Grawhgrawng Lih Koe (3/300) Satsana ----  | 24        |
| (1) Dee Bleeh Satsana Loe Num Loe Yieh<br>(3/300) -----                                | 27        |
| (2) Grawng Hoek Loe Num Loe Yieh Daux<br>Satsana Vax Loi Sam Ngam<br>(1981-1991) ----- | 27        |
| <b>3. Poi Ting Jubeeli (75) Num -----</b>  | <b>30</b> |
| <b>4. Grawhgrawng Ai Pao Pleek (Sgu) -----</b>   | <b>32</b> |
| K. Grawng Kaing Pa Yuh Awm Lox Pa Tawm<br>Tax Saw Lux -----                            | 36        |
| (1) Grawng Thut Lai Rhax Vax -----   | 36        |
| (2) Grawng Thut Phuk Lai Sigang Khri<br>(Camlig) -----                                 | 37        |
| (K) Phuk Lai Sigang Khri Pa Prim<br>(Old Testament) -----                              | 37        |
| (Kh)Grawng Deeh Khrawm Camlig<br>Prim Mai Camlig Khraox -----                          | 38        |
| (3) Kaing Jhaw Pa Hoik Yuh Nawh<br>Khankix -----                                       | 38        |

#### Lawg (4)

#### TAX SAW LUX MAI KAING HAKTIEX

|  |           |
|--|-----------|
| <b>1. Tax Saw Lux Mai Kaing Haktiex Daux Ceu<br/>Pui Min -----</b> | <b>39</b> |
| K. Grawng Pa Ti Haok Huan Ceu Pui Min ----                         | 39        |
| (1) Grawng Lih Koe Pa Ti -----                                     | 39        |

|  |           |
|--|-----------|
| (K) Daux 1990 num, Grawng Viex<br>Mai Silah Daux Poi Rom Ting ---          | 43        |
| (Kh)Grawng yuh Pati Nyilakhan<br>Bawg(1) -----                             | 44        |
| (Ng)Grawng Ploi Pati Kosalie Hu<br>Daux Amyota Nyilakhan -----             | 45        |
| Kh.Grawng Sum Pati Ra Bawg Tix Bawg ----                                   | 47        |
| (1) Grawng Hu Tang Lai Ka Veng<br>Nepitaw, Son Sang Pon Sum Pati ----      | 50        |
| (2) Grawng Dux Ka Lum Ting -----   | 51        |
| (3) Grawng Viex Mai Silah Daux<br>Patizong Dimokarasi -----                | 52        |
| (4) Grawng Viex Mai Silah Daux<br>Japhyiet Yoekaux Poi (၂၇၂၆၀၆၅၅၅၅၅၅၅၅)--- | 52        |
| (5) Poi Rom Ting Pati Bawg (2) -----                                       | 56        |
| (K) Grawng Deeh Loh Paho<br>Kawmiti -----                                  | 62        |
| <b>2. Tax Saw Lux Mai Kaing Haktiex Daux Ceu<br/>Pui Vax -----</b>         | <b>65</b> |
| K. Grawng Pa Ti Haok Huan Ceu Vax -----                                    | 65        |

#### Lawg (5)

#### TAX SAW LUX MAI CEU PUI VAX

|   |           |
|---|-----------|
| <b>1. Been Yungyi Ceu Pui Vax -----</b>                         | <b>71</b> |
| <b>2. Grawng Riieang Khix Been Yungyi Ceu<br/>Pui Vax -----</b> | <b>73</b> |

|  |                |
|--|----------------|
| K. Grawng Riieang Khix Been Yungyi Ceu<br>Pui Vax -----  | 73             |
| Kh.Krax Grawng Shiao Riieang Khix Been<br>Yungyi Ceu Pui Vax -----   | 76             |
| <b>3. Grawhgrawng Ceu Pui Vax -----</b>  | <b>79</b>      |
| K. Grawng Kid Kaing Pa Krai Kuad Vax Dix -<br>Kh.Grawng Krax Ot Krax Koe Ceu Pui Vax<br>Baux Ju Kid Kaing -----  | 83<br>84       |
| Ng.Deer Bleeh Rung Krak -----  | 88             |
| <b>4. Grawhgrawng Lai Vax Khankix -----</b>  | <b>89</b>      |
| K. Lai Vax Pa Shiao Daux Meung Man -----<br>(1) Lai Vax Prim -----<br>(2) Lai Vax Khraox -----   | 90<br>92<br>92 |
| Kh. Lai Vax Pa Shiao Daux Meung Hawx -----<br>(1) Pakpeung Tiag Ka Lai Vax Khraox Pa<br>Koe Daux Meung Hawx Mai Lai Vax<br>Khraox Pa Koe Daux Meung Man ---- | 95<br>96       |
| (K) Pakpeung Tiag Tix -----  | 96             |
| (Kh)Pakpeung Tiag Ra -----   | 99             |
| (Ng)Pakpeung Tiag Loe -----  | 100            |
| Ng. Lai Vax Pa Koe Daux Meung Thai -----   | 101            |

### Lai Jah

Cao Tiem lai in , ang keud ti tiem "Grawng Tax Sawx Lux Mai Lai Mhai Nawh" heue. Viang mawh nan nawh keud ti tiem nong grawng cao kaing cao kap ceu pui Vax mai cao kaing cao kap daux ceucad, son sang ang ex piawm kix daux phuk lai tix phuk heue. Jao an , yam cao tiem lai jah ti khrawm tix priex ka grawng cao kaing cao kap ceu pui Vax tiblah, tom yaox Tax Saw Lux, jhak heue, tom yaox ti tiem " Grawng Tax Saw Lux Mai Lai Mhai Nawh" heue. Cao tiem lai kawx kied gauxrhawm gauxrhi kheu yaox ti tiem grawng Tax Saw Lux pa mawh cao kaing cao kap ceu pui Vax ex tix kaux heue. Bawg blah yam yaox ti kum kah mai Tax Saw Lux, nawh kied daox am kheu lox, mai rhawmrhi Tax Saw Lux heue. Tax Saw Lux mawh pui tix kaux daux pa nabyam cao tiem lai heue. Ceu pa tiem nawh ka grawng Tax Saw Lux, kheu nabyam nawh ka nawh ang mawh, viang mawh nan, kheu Tax Saw Lux mawh pui tix kaux pa ang ex pon chix piawm heue.

Yam khrawm ti tiem ka phuk lai in, cao tiem lai yaox krax nu krax cien tom nie ceu heue. Kheu mawh bawg yam ot Tax Sau Lux veng Pang Sang daux meung Vax, ang yaox ti pon sawg (95%) ka grawng Tax Saw Lux daux haktiex meung Man pa

kwang acuyax heue. Yam cao tiem lai chawk ka pui khankix, kix ang pon ah pa mawh khankix see see kheu lhat kix heue. Tax Saw Lux kawx taing lox , mai ah nin jheung jheung ka cao tiem lai " Pa mawh tiem awm pa mawh, paw ti kox tiem pa ang mawh khankix mawh pa mawh" heue. Kheu nawh tawx lox satix ka cao tiem lai yuh nan, cao tiem lai yaox krax nu krax sikhawp. Viang nawh hu Lashio ti vud ti vud kawx, bawg blah ang pon tiem lai tix grawng. Ang koe krax vhah rhawm daux krax hu nawh. Grawng pa kied vhah rhawm mai koe riang nawh kienie mawh grawng pa ah Rev.Ai Pao Pleek pa ot meung Thai ka nawh ngie heue. Grawng pa ah Tax Saw Lux mai Rev. Ai Pao Pleek mawh tix ceu khaing heue.

Krax nu krax cien ra ceu ti ceu kienie kheu kied tux phuk lai pa mhai ti deuh grawng ceu pui Vax mai Min heue. Viang caw ti yaox ti jhak ti tiem ka phuk lai kawx, kheu yaox pa tokaux nawh ti yaox ti hu mai mhai ti tiem, tom yaox ti tawx bawgyam rheung yuh nin heue. Mau cai mau shiao kawx yaox ti lheu shiao khaing pa yaox ti shiao heue. Yam in pui pa yuh kaing tau mai Tax Saw Lux nhaox kheu mawh kix cao kaing cao kap daux kaing haktiex, daux lai gee, daux cao yuh kaing acuyax mai daux beenli , jao an, tom yaox tix pau yam tien kix son sang kum kah mai kix, jao an, tom yaox ti tawx bawgyam rheung yuh nin khawm heue. Bawg blah kheu ang yaox kix, ngawh krax mai bawg yam mawh gie gie going going heue. Pui tiblax kheu chix ah kix plak piang nong, lih ti mawh krax sum krax nai son ceu pui ex heue.

Krax nu krax cien loe ceu tix ceu kienie kheu tux lai lox

ex, kheu ang ex koe phuk lai pa paoh dee bleeh lox ex (အဘိဓာန်), mai kheu ang ex koe cubcaw pa yuh ti priex lox khraox baux ju mawx baux ju an, tom yaox krax nu krax cien yam tiem lai heue. Lox tiag " yam chawk cao tiem lai ka pui pa ao min daux kaing plak haktiex tix kaux mai daux kaing yungyi ceu pui Vax tix kaux daux poi ku paox tix ngaix ka lox man အမျိုးသားလွတ်တော် (Amyo Ta Lut Daw), ka kiex, jhak heue, kiex khrawm ra kaux ah nin " ang koe daux lox kah ceu pui Vax" heue. Jao an, cao tiem lai kawx deeh toe tiem ka lox man အမျိုးသားလွတ်တော် plak lai vax ex "Amyo Ta Lut Daw", mai ပြည်နယ်လွတ်တော် plak lai vax ex "Pi Nie Lut Daw" heue. Sara Ting Noel Kya Heh pa toe tiem (ဘာသာပြန်) ka camlig kawn khrit plak ceu pui Akha, mai pa pon bawix (ဘွဲ့) B.Th, B.D, M.A (Linguistics) khaing "Payap University , Chiang Mai, Thai, mai pa chix lox ceu pui (13)ceu, ah nin ka cao tiem lai, " Krax grawng pa kied mhawm yam toe tiem ex lox (ဘာသာပြန်) kienie yaox ti eei lox ceu pui tang ceu heue. Phan ah lox tiag (ဥပမာ) 'Cancer' lox karapaing ex caw ti ah ' kinsa' , mai 'Bank' (dee priex mau) lox karapaing caw ti ah 'bang'. Kheu ceu pui Karapaing eei ka lox ceu pui tang ceu, lox lai kix tom vieh va daux bee ma haktiex heue. Krax pa ah tax , yiex, miex, keeing ka lox ceu pui tang ceu ang mawh krax kaig krax tua. Phan caw khaw mai grawng lai tiem ex, yaox ti shiao" heue. Mawh kheu nan, phan ex eei mai shiao ka lox shiem, lox man, lox hawx , lox karapaing mai lox thai, ang lai lud. Viang mawh nan, ex yaox ti lheu tiem lox lai pa hoik tawng ex khawmuik, pa hoik dawg koe daux lai ex heue. Ex yaox ti tiem (a) ah yam lo ex ka



lox kix ngie heue. Krax pa tiem son sang jhak ting pui ex, son sang nabyam pui ex, mai son sang ao min ex kienie mawh krax pa kied lauxrhawm heue. Ang joeng pie mawh ding an lox sikah pa tawng nong dee ot ex, ang yaox ti mawh lai pui hun mai lox pui hun heue. Phan ex khaw ti eei lox sikah ceu pui tang ceu kawx yaox ti eei heue. Phan ang awm yuh nan, phan toe dee bleeh plak Vax (𑜋𑜧𑜨𑜃𑜫) chix kieh cao phat lai kix sivix kah heue. Kheu lox lai an chix kieh dee bleeh nawh tang khawm heue. Lox lai pa ang cao phat kix tawng kienie mawh gie gie going going heue.

Ceu pui Vax, kheu singai, mai tang gawng lua ceeix, mai kheu rawm klawng koe sinax ceeix, mai kheu dee ot tang ceeix, jhak heue, lox sikah lih ti tang siyox heue. Ceucad tiblah, kheu lox sikah kied tang siyox tix cub mai cub, ang yaox ti tawng mhawm mhawm ka lox sikah pa sikah tix kaux mai tix kaux heue. Viang tang mie ding kawx lox sikah pui hun mai lox lai pui hun caw ti koe daux pa ting ceu son ceu pui Vax ex heue. Mawh kheu nan, ceu cad ku cub ku caw, phan yaox ti kum kah mai paox tix kawx kum kah, ceu pa caw ex ti yhawm plak tix kawx yhawm, ceu pa yaox ex ti cox kawx cox, mai ceu pa yaox ex ti deuh kawx deuh son koe lox sikah pui hun mai lox lai pui hun son ceu pui ex daux been ot (𑜋𑜧𑜨𑜃𑜫) ex heue. Daux phuk lai in, ah ti jhi ex yaox grawng koe lai vax ex loe ceu, ceu pa mawh

- (1) Lai vax pa koe daux meung Man
- (2) Lai vax pa koe daux meung Hawx, mai
- (3) Lai vax pa koe daux meung Thai heue.

Ang joeng mawh an, pie daux meung Man koe lai vax pon  
(4) ceu pa mawh

- (1) Lai vax pa koe plak haktiex Pang Sang
- (2) Lai vax pa koe plak haktiex Meung Mau
- (3) Lai vax pa koe plak haktiex Tangyan
- (4) Lai vax pa shiao Numli Vax

heue. Viang pui chi lai vax tux kawx, kied nie lai vax ex heue. Hoek tom yamin, lai vax ex ang nyang bax mawh kriem kriem gre gre kaux kaux cong cong mai kawh koe pa sivix heue. Phan ah lox tiag kienie phan ex tiem "poi", pui tiblah tiem "pwie" pui tiblah tiem "pawie", jao an, yam cao tiem lai tiem ka lai in, kieh koe krax pa sivix rhawm heue.

**\* Krax nu krax cien pon ceu tix ceu kienie mawh grawng "Nyiex Kawndoe Vax" heue. Daux 2012 num, yam hoik hoek Tax Saw Lux daux veng Lashio, cao tiem lai tom yaox ti pon tiem heue.**

Daux phuk lai in, daux lawg (1) mawh grawng "yam nyawm ju Tax Saw Lux mai nyiexma nawh", mai Lawg (2) mawh grawng kakoije pa mawh lai mhai Tax Saw Lux, Lawg (3) mawh grawng pa yuh Tax Saw Lux daux beenli kawnkhril, Lawg (4) mawh kaing haktiex grawng pa thung bung Tax Saw Lux ka ceu pui Min mai ceu pui Vax, Lawg (5) mawh grawng pa thung bung Tax Saw Lu ka been yungyi ceu pui Vax meung Man, mai grawng pa sawg ti priex ka riieng khix cie pui ex, mai grawng been kid kaing pa ah kuad ex dix, mai grawng krax ot krax koe ceu pui Vax, yam kid kaing dix, mai grawng rung krak heue. Ang joeng mawh an, son sang pon gau ex, mhai ex

mai tawng ex grawng lai Vax pa koe daux meung Man, meung Hawx mai meung Thai, tiem ti deuh daux phuk lai in, mai kheu tiag ex yaox lai vax pa koe daux meung Hawx mai lai vax pa koe daux meung Man, ex yaox ti pon pingnya tom nie ceu heue. Daux ceu pui Min mai ceu pui Vax, grawng pa thung bung Tax Saw Lux ku ceu mawh been (ဆိုဇ်) ceu pui Min mai ceu pui Vax ti dah dah heue. Been (ဆိုဇ်) an, ang doh pon yuh grai, ang pon ti deeh yuh, been an yaox ti mawh daux pa rah pa see heue.

Mawh kheu nan "Grawng Tax Saw Lux Mai Lai Mhai Nawh" kiene mawh been ceu pui ex, mai mawh been meung ex, mai mawh been bee ma haktiex heue. Awm an, grawng maix mai aux kienie mawh been (ဆိုဇ်) ceu pui ex, mai mawh been meung ex, mai mawh been bee ma haktiex heue. Ang joeng mawh an, grawng pa yuh tax yiex miex keeing kawx viex heue. Grawng pa hoik luan viang ex ang pon cox kawx, pa koe yam in, mai bawg yam pa sang hoek khankix, chix pon ti cox, chix pon ti keud mhawm mhawm, chix pon ti teei riang rao, chix pon ti gau sawn, chix pon ti yuh mai chix pon ti mhai heue. Awm plak piang phan cao phat lai kix pon yuh, yuh nan, cao tiem lai in, kied gauxrhawm gauxrhi tete telai, viang yaox ti kham krax nu krax cien yam thut (plih lih) phuk lai in ang ah, mai phuk lai tang ceu ang ah heue.

## Lawg (1)

### YAM NYAWM JU TAX SAW LUX MAI NYIEXMA NAWH

#### 1. Yam Tax Saw Lux Ot Cawng

U Saw Lux keh daux 15.10.1944 ngaix, daux yaong Khutiex, baux veng meung Yang (ပိုင်ခမ်းမြို့နယ်) heue. Nawh mawh kawn ai, sara Tax Ciet Rong, mai Yax Vox Hawx, mai nawh mawh kawn pa ting khaing daux pux nan lih nawh liah kaux heue. Pux nan lih nawh mawh Yax Ruthax, Tax Yaw Bax, Yax Rosi, Yax Rudi mai Tax Yawnax San heue.

Daux 1946 num, yam kawn koe nawh 2 num, keeing nawh dux ot daux vang Bana. Mai keeing nawh yaox ti teei beeh glawm, cao kwang priex ih priex un, mai cao kwang bawda daux vang an heue. Daux 1949 num, deeh yaox ti dux ot daux vang Cing Tong khaing Nhawng Pu Bana heue.



*Yax Ruthax*



*Tax Yaw Bax*



*Yax Rosi*



*Yax Rudi*



*Tax Yawnax San*

Daux 1952 num, kheu kied vieh va dee yuh kaing daux vang meung Mau, Rev. Vinsinyang tom ploi ka sara ting Yawsuxching, sara Ai Sang, sara Awung, mai sara Ciet Rong, hu daux vang meung Mau khaing vang Cing Tong son sang pon teem coi ka sara ting Sam Pleek Nap pa hoik dawg ot tan heue.

Daux 1953-58 num, nawh gau lai tom hoek awng loe tan daux cawng meung Mau. Nawh viex daux pui pon kaux pa pon krax teem krax coi pa mawh simex ra kaux mai sibon ra kaux, son haok cawng gau khaing myo uk Tax Kham Ca pa ot daux meung Mau, kheu lox simiang Tang Laing (တန်လှိုင်), pa kwang kaing daux bauh haktiex meung Mau heue. Kix pon kaux an mawh Tax Saw Lux, John (a) Tax Sam Yawn kawn Tax Lam Nap, Yax Iesta kawn yex sara ting Sam Pleek Nap, mai Yax Rebekxax kawn sibon sara ting Yawsuxching heue. Kix pon

kaux pon krax teem krax coi son haok cawng gau lai khaing lum pa kwang kaing daux bauh haktiex meung Mau heue. Otkhaix son sang gau lai ploi ka Tax Saw Lux hu kaung Ayavadi (ဧရာဝတီတိုင်း), daux baux veng Myang Mya (မြောင်းမြမြို့နယ်), Yetue Yekang (ရေတွင်းရေတန်) mai ploi ka Tax Sam Yawn, Yax Iesta, mai Yax Rebekxax hu daux veng Yang Kong heue.

Daux 1959 num, Tax Saw Lux awng pon tan daux veng an heue. Khaix hoik awng nawh pon tan, son sang baux pon haok nawh cawng gau lai, nawh baux hu daux veng Nam Kham (နမ့်ခမ်း), daux cawng satsana pa kaux Shweli Vally High School, tom hoik awng liah tan heue. Daux 1964-65 num, baux hu baux veng Myang Mya Yetue Yekang tom hoik awng nawh aliah tan heue.

## **2. Grawhgrawng Yuh Kaing Acuyax**

Daux 1965 num, khix liah, 8 ngaix, nawh yuh poi ku paox mai Yax Meri, daux yaong Mu Nawx De, pa koe daux baux veng Navi heue. Daux num daux khix an, jah 15 ngaix hoek tom khix 12, kheu tawx Tax La Maung pa mawh myo uk ra kaux tix kaux pa ot daux baux veng Navi, beeh glawm ka nawh, nawh yuh cao kaing pa yuh krax cheu, jah tom Pang Long tom hoek Navi heue. Yam tei nawh beeh glawm yuh krax an, Tax Law E kawn sara ting A Sang, mai sara ting Ai Khun pa yuh sara yaong Namax nhaox tom viex khawm heue. Daux 1965 num, khix 12, kheu jao lox simiang Tang Laing pa kwang bauh haktiex Kon

Long, nawh yaox ti yuh cao pau lum dauh veng Pang Vai, dauh pon khix heue.

Jah tom 1966 num, khix pon, nawh mawh cawng uk dauh cawng acuyax, dauh veng Pang Vai, simoeng nawh pa kaux Yax Meri mawh cao kaing dauh lum pa kaux “Lax Lax Tax Tax” (လယ်ယာနှင့်လုပ်ငန်းပေါင်းစုံသမဝါယမအသင်း) dauh veng Pang Vai heue. Yam an, Rev. Moses (a) Rev. Ai Pao Pleek (Sgu) kawn sara ting Sam Pleek Nap, yuh kaing dauh lum pa kaux “Pax Pax Kax” (ပြည်သူ့ပစ္စည်းကော်ပရေးရှင်း) heue. Daux 1966 num, khix aliah, 19 ngaix, nawh tom yaox kawn yex tix pa kaux Dina, dauh nyiex pa tawx acuyax dauh lum Pang vai heue.

### 3. Grawng Lih Mawh Cao Kaing Kakoiiye

Daux 1967 num, khix 1, 1 ngaix, kheu tawx acuyax beeh glawm ka nawh, nawh yaox ti sawg mai phaw ka kraung naing mox (လက်နက်ပုန်း) dauh haktiex Vax heue. Yam nawh yuh kaing ceu an, dauh 1969 num, khix liah, nawh pon sawg mai phaw kraung naing mox (လက်နက်ပုန်း) ku ceu 96 pang. Simiang Tang Laing, mai Tax Tun Nawng pa mawh simiang lien ra kaux tix kaux dauh tab khang (3), mai Achietsli pa mawh simiang yie (ရဲမင်းကြီး), dauh bauh veng Konlong tom deeh tawx ka kraung naing khawmuik pa pon sawg mai pa pon phaw nawh ka nawh, son sang pon shiao dauh kakoiiye Pangvai. Jah tom singaix an, nawh lih ti mawh cao kaing kakoiiye Pangvai heue.

### 4. Nyiexma Tax Saw Lux

Daux 1965 num, khix 6, 8 ngaix, dauh yaong Ma Nawx De, khaix hoik yuh nawh poi ku paox mai Yax Meri, kiex ra kaux tom pon kawn simex, kawn bon 8 kaux mai koe kawn priex kawn eei tix kaux heue. kawn simex mai kawn sibon kiex, mawh awm plak greem heue.



Yax Dina



Tax Yawtax



Tax Awstalux



Yax Di Me  
(Nang Mun)



Yax Di Se  
(Nang Shang)



Yax Di Le  
(Nang Shwe)



Yax Di Yi  
(Nang Mhoe)



Tax Yawnax Lux



Sara Joseph

|    | <b>Ceu Kaux</b>        | <b>Num Keh</b> | <b>Dee Keh</b> |
|----|------------------------|----------------|----------------|
| 1. | Yax Dina               | 19-7-1966      | Pang Vai       |
| 2. | Tax Yawtax             | 5-7-1968       | Meung Mau      |
| 3. | TaxAwstalux            | 17-8-1970      | Kon Long       |
| 4. | Yax Di Me (Nang Mun)   | 19-3-1973      | Lashio         |
| 5. | Yax Di Se (Nang Shang) | 10-10-1975     | Lashio         |
| 6. | Yax Di Le (Nang Shwe)  | 4-10-1977      | Lashio         |
| 7. | Yax Di Yi (Nang Mhoe)  | 6-12-1978      | Lashio         |
| 8. | Tax Yawnax Lux         | 6-5-1982       | Lashio         |
| 9. | Sara Joseph            | 4-6-1971       | Hopang         |

## Lawg (2)

### TAX SAW LUX MAI KAKOIYE

#### 1. Sao Hing Kakoiye

Daux 1964-1965 num, Tax Bo Khwat yuh paox mai yaong Ru yaong Soi mai Tax Ciet Song pa ot Vax Leen, mai haok puing ka Tax Cao Tiex heue. Grawng puing nawh Tax Cao Tiex kienie viang kum kah mai Tax Cao Tiex kawx, kheu Tax Cao Tiex ang rieb ka pa kum kah nawh, jao an, nawh sang ah ti tik ti puing hoek tom uik riah heue. Viang mawh nan cub mawx kawx ang pex ka paox tix heue. Yam an acuyax tawx beeh glawm mai dux ka Tax Saw Lux daux veng Pang Vai khaing Na Vi heue. Daux 1967, acuyax tawx beeh glawm ka Tax Saw Lux son sang pon laig Tax Cao Tiex daux pa yien pa yawk daux phin daux been meung Man heue. Kheu tawx acuyax beeh glawm yuh nan, Tax Saw Lux ploi ka Tax Ai La (a) Keeing Sin La dee ot Tax Cao Tiex plak Sao Hing. Daux num 1968, khix 1, 17 ngaix, Tax Cao Tiex hoek daux veng Pang Vai mai cub lien nawh 200

haoh, son sang ap nad tix ka acuyax heue. Ka nad an khankix, Tax Saw Lux teei carang mai ap ka daux tawm taix myo uk(မြို့အုပ်) Tax Myo Lwin heue. Yam an Tax Myo Lwin mawh myo uk haktiex Pang Vai heue. Acuyax deeh tawx nad pa hoik ap Tax Cao Tiex ka Tax Cao Tiex son sang pon kwang mai pon deeh tieb tie ka haktiex nawh pa mawh haktiex Sow Hing, mai sum ceu kaux cub Tax Cao Tiex mawh Sao Hing Kakoije heue.

“Cao Tiex” kienie mawh lox sikah Shiem. Dee bleeh “cao” kienie ex yaox shiem kix shiao tang ceukaux Tax vat, mai pui pa ao min, mai pui pa nabyam kix heue. Dee bleeh “Tiex” kienie “jah heue” (a) "pa jah tix sum". Mawh kheu nan dee bleeh “Cao Tiex” kienie mawh “simiang pa jah”. Dee bleeh “Sao Hing” kienie mawh “gawng rang”. Mai ceukaux Tax Cao Tiex plak Vax kienie mawh Tax Nyi Nap Ka mai ceukaux keeing nawh mawh Tax Ai Ka heue. Pui khankix ang tawng plak nie mawh ceu kaux nawh Tax Nyi Nap Ka viang mawh nan tawng ceukaux nawh mawh “Tax Cao Tiex” nong heue. Hoek tom yamin daux veng daux yaong Vax tiblax, kawn shiao “Been Tax Cao Tiex” heue. Daux num 1985-86, Tax Cao Tiex yuh mai krub gawng mu tix mu, mai sum ceukaux gawng mu an mawh “Awng Daw Mu Sedi” daux yaong Luk Si Tong”, baux veng Tangyan. Simoeng nawh koe (5) kaux, mai: ceukaux (5)kaux an, (1)Yax Ok Tao, (2) Yax Ok Taing, (3) Yax Iet Rai, (4) Yax I Khwat, (5) Yax Yex Kreng, mai yam in kawn simex nawh koe (16)kaux, kawn sibon (6)kaux, kawn saux (46)kaux, mai kawn sex (3)kaux

heue. Nawh dux ju tix baux ju tix ju (yum), daux veng Mandale daux singaix 20-7-2007.

Yam ot Tax Cao Tiex, yaong Luk Si Tong baux veng Tangyan nhaox, yam hoek nawh veng Tangyan ku bawg, nawh hoek ti peung pan daux nyiex keeing cao tiem lai. Yam nawh hoek ti peung pan yuh nan, nawh ang tawx krax sivix ka cao nyiex, nawh kieh kawn lien tix kuik yuh priex son pa to kaux tix mai son cao nyiex khawm. Priex an kawx mawh priex liah nawh.

## 2. Yaong Brex Kakoije

Cao kaing yaong Brex pa kaux Tax Ai Se (Plak Man), Tax Ai Shia Se (Plak Hawx), Tax Shia (Plak Vax) kienie khaix hoik kum kah mai acuyax daux veng meung Mau, mai nawh ap nad tix ka acuyax. Acuyax kawx, khaix hoik teei ka carang mai nam bat nad kix an, mai deeh tawx ka Tax Shia pa mawh cao kaing, son sang tieb tie ka haktiex yaong Brex, mai: sum cub an mawh Yaong Brex Kakoije heue.

## 3. Yaong Ru Kakoije

Tax Nyi Cai mawh cao giex kaing Yaong Ru Kakoije. Nawh mawh kawn Tax Ciet Kloj pa mawh pux simiang Tax Tao. Yam Tax Tao ot meung Hawx, nawh mawh simiang yaong Soi, mai Tax Sax mawh cao giex kaing lien. Yam kiex hoik ot plak meung Man, kiex ra kaux ang lai giex plak kraung naing heue.

Otkhaix, yaong Raog laig tix viex tau daux Yaong Ru Kakoioye. Jao an, yaong Soi, Vax Leen mai yaong Raog lih tix mawh kakoioye pa khrawm paox tix loe cub daux Yaong Ru Kakoioye. Cao kaing pa ting mawh Tax Nyi Cai mai cao kaing pa ting ra kaux tix kaux deuh ka loe kaux. Ceukaux cao kaing pa ting ra kaux tix kaux kienie mawh (1) Tax Sai Ka (a) Yawbat Sai Ka (Yaong Soi), (2) Tax Ciet Song (Vax Leen), (3) Tax Nyi Mhawm (Yaong Raog) mai kix mawh ceu cad simiang Vax khawm uik heue.

Cub caw kakoioye Vax pa koe daux meung Shiem mawh awm plak greem heue.

| <b>Cub caw</b>          | <b>Cao Kaing</b> |
|-------------------------|------------------|
| (1) Pang Vai Kakoioye   | Tax Saw Lux      |
| (2) Sao Hing Kakoioye   | Tax Cao Tiex     |
| (3) Yaong Ru Kakoioye   | Tax Nyi Cai      |
| (4) Yaong Brex Kakoioye | Tax Shia         |
| (5) Pang Long Kakoioye  | Tax Khun Sam     |
| (6) Man Sai Kakoioye    | Tax Khun Leng    |
| (7) Veng Ngeen Kakoioye | Tax Ma Ha Sang   |

1967 num tom hoek 1973 num mawh bawgyam kakoioye. Daux 1973 num, khix 4, 21 ngaix, acuyax meung Man deeh loh ka cub kakoioye khawmuik son laig tix yuh awm lien (a) yie. Pui mawx pa ang hiex simie ti laig yuh lien (a) yie kawx chix heue. Jah tom singaix an, cubcaw kakoioye ang lai koe heue.

#### 4. Grawng Laig Ba Ka Pa Hatiex Vax

Daux 11, 4, 1969 ngaix, Ba Ka Pa lih mai haok puing ka Pang Vai. Kheu jao an, tab acuyax mai cao pa yuh kaing acuyax khankix, mai pui pa yuh kaing daux lum myo uk khawmuik pa koe daux Pang Vai, yaox tix dux tix ot meung Mau. Daux Pang Vai kawn deuk nong Pang Vai Kakoioye tix cub pa mawh cub Tax Saw Lux heue. Mawh kheu nan, Pang Vai Kakoioye yuh dee rieb tix puing daux yaong Rhax, mai laong yaong Rhax, mai dee gawng lua pa koe tan. Yam an Ba Ka Pa hoik pex naing, hoik pon tix teei haktiex dee koe lum, lah, yaong ting, mai gawng Muik Sung pa koe laong yaong Pang Vai mai dee an kix yuh mai sum tab lien tix kaux kaux cong cong heue. Lah Pang Vai Kakoioye kawx deeh paoh daux yaong Rhax tan heue. Kheu dex kiex mai paox tix, tix cub mai tix cub yuh naing jawm ka paox tix, ku singaix heue. Jah tom 1969 num khix pon, hoek tom 1970 num khix tix, daux kao khix in, mawh nong Pang Vai Kakoioye tix cub pa rieb mai kham tix puing ka Ba Ka Pa, dee yaong Rhax, dee gawng lua pa koe tan. Kheu hoik yhawm riang rao sipie sipie tix mie nyao phao, Tax Saw Lux tom mhaing krax teem krax coi ka Yaong Brex Kakoioye, Yaong Ru Kakoioye, Sao Hing Kakoioye mai tab acuyax pa ot daux meung Mau heue.

Kheu Tax Saw Lux mhaing krax teem krax coi, daux 16, 1, 1970 ngaix, Tax Sai Doe pa mawh cao kaing yaong Ru Kakoioye ra kaux tix kaux hoek mai lien tix 30 kaux daux

yaong Rhax dee koe kham tab (ဆာဝ်) dee yuh naing heue. Daux 17, 1, 1970 ngaix Tax Tang pa mawh cao kaing yaong Brex ra kaux tix kaux kawx viex jung pui tix 100 kaux, mai Tax Ai Kat pa mawh cao kaing Sao Hing ra kaux tix kaux tom viex jung pui tix 100 kaux, mai Tax Bo Pyong pa mawh lien acuyax kawx viex lien tix 25 kaux baox hoek daux yaong Rhax dee koe kham tab dee yuh naing tan. Daux ngaix an, cubcaw khankix pa hoek mai Tax Sawx Lux kum kah tau son sang deeh pon puing tix teei gawng Muik Sung pa hoik pon Ba Ka Pa. Daux 18 ngaix plak bo koi hu mai mox hu dee gawng Muik Sung pa ot Ba Ka Pa, jhak heue, daux 19 ngaix, daux ponngawb cau cau ka ang praix bax mung riang, haok puing ka Ba Ka Pa pa koe piang gawng Muik Sung heue. Yam haok puing ka Ba Ka Pa piang gawng Muik Sung yam dex sang riang praix, kawn ai, Tax Cao Tiex pa kaux Tax Ai Kat pa mawh cao kaing ra kaux tix kaux daux Sao Hing Kakoiye tom mat mai yum heue. Mawh kheu nan, cub Sao Hing Kakoiye klawm ka Tax Ai Kat mai sipaung nawh daux meung Mau heue. Yam haok puing ka Pa Ka Ba dee gawng Muik Sung, kheu ang pex, Yaong Brex Kakoiye, Yaong Ru Kakoiye, Pang Vai Kakoiye mai tab acayax khawmuik yaox tix deeh khaix mai dux tix ot meung Mau. Yam an, Pang Vai Kakoiye kawx deeh khaix dux tix khaing yaong Rhax, mai teei dee tix, haktiex Piang Pleung mai Num Tom Yaong Tix mai rieb tix puing tan heue.

Kheu Ba Ka Pa lih tix hoek nie mai kix tom baox pon

puing tix teei haktiex tix dah hoik tix dah. Jhak heue, daux 1971 num, khix pon, 17 ngaix, kix pon puing tix teei meung Mau khawm heue. Kheu Ba Ka Pa hoik pon puing tix teei meung Mau, Pang Vai Kakoiye, Yaong Ru Kakoiye, Yaong Brex Kakoiye, Sao Hing Kakoiye, mai tab acuyax deeh khaix mai dux tix plak Hopang heue. Cub Kakoiye khawmuik deuh lum tix daux veng Hopang mai teei dee ot tix haktiex Pang Long, Navi, Pang Yaung mai Kawng Kaw, mai deuh dee an mawh dee yuh naing heue.

Daux 1973 num, khix 4, 21 ngaix, acuyax meung Man deeh loh ka cub Kakoiye khawmuik son laig tix yuh awm lien (a) yie. Pui mawx pa ang hiex simie tix laig yuh lien (a) yie kawx chix heue. Jah tom singaix an, cubcaw kakoiye ang lai koe heue.




### Lawg (3)

## TAX SAW LUX MAI BEENLI KAWN KHRIT

### 1. Nyiex Kawndoe Vax

Daux 1969-1970 num, khaix hoik pon Ba Ka Pax ka haktiex Pang Vai, haktiex meung Mau mai haktiex Vax tiblah, dee ot Vax, jao naing sivai an kied nie miex mai, kawndoe heue. Jao an jah tom 1970 num, khix 3, Tax Saw Lux jah ti kraix khrawm kawndoe 36 kaux, mai paoh nyiex kawndoe vax daux veng Kon Long. Nyiex kawndoe vax an, acuyax teem coi gaoux 10 cheu (thong) ku khix ku khix. Pa kawn deuh kraung khrai mau cai mai priex ih priex un khawm uik, mawh Tax Saw Lux pa plih pa lih heue. Daux 1973 num, Tax Saw Lux tawx beeh glawm bawda-uk ka sara ting Sai Sin pa ot Hopang yamin. Nyiex kawndoe an acuyax tawx dee, dee koe cawng daux veng Konlong. Daux 21, 4, 1973 ngaix, acuyax loh ka kakoiye khawm uik kieh deeh mawh lien mai yie acuyax.



*Sara Ting Sai Sin*

Kheu hoik loh yuh nan, Tax Saw Lux kieh kawndoe khawm uik mai kawn simoeng, paoux nyiex paoux ma tix hu ot daux krax byu ha(ဗျူဟာလမ်း), veng Lashio, mai nawh vai nyiex Tax Bo Shang Ting Kam ti vud mai deuh kix ot tan heue. Khaix hoik sum nyiex pa koe yam in, daux nyiex kawndoe an, kawndoe (36) kaux pa viex hoek khaing veng Kunlong, mai pa deeh baoux hoek (20) kaux, jao an lih ti koe kawndoe (50) kaux haoh.

Daux 1974 num, daux bawgyam an, saramax Lu Di hoek ka Tax Saw Lux, mai krai ka hoik lih khaing kaing nyiex kawndoe vax pa ot greem Num Li Shiem, mai ka grawng simie tix yuh kaing tau mai Tax Saw Lux. Jao an Tax Saw Lux tom cox khrex son sang pon yuh saramax Lu Di kaing daux nyiex kawndoe tix heue. Yam an sara Ai Rai hoik plud ti mawh bawda-uk khaing sara ting Sai Sin pa yuh bawda-uk nhaox kheu hoik kieh Tax Saw Lux ti nawh (sara ting Sai Sin) yuh sara ceu cao daux yaong Ho Peek Kaung Nyot. Kheu hoek saramax Lu Di, Tax Saw Lux cox khrex son sang tawx saramax Lu Di yuh kaing greem sara Ai Rai. Yam cox khrex yuh nan, khaix hoik rheung ra ngaix pa hoek saramax Lu Di ka Tax Saw Lux, jhak heue, kawndoe (49) kaux pa kraix khrawm saramax Lu Di tix yaong

hoik tix yaong khaing haktiex Loi Maw Tangyan, Hopang, meung Mau, Navi mai Pangvai, awm lox tawm sara ting Mu La daux 1971 nhaox, jhak heue, hoek khawm lhiex praix mai kraung khrai tix, plak pon bo (8) nari (taix) pai ceeix ceeix heue. Yam Tax Saw Lux chawk ka kawndoe kix an, kix krai grawng ang nyang yaox ti sawm mai hoek ka saramax Lu Di pa moh kix. Mawh kheu nan Tax Saw Lux mai moeng nawh Yax Me Ri tawx kix sawm mai tawx dee ot dee it kix. Ang lai hu krai ka pui mawx, kieh kix it kheu hoik kied faik praix heue. Yam hoek pongawb pasax Tax Saw Lux tawx satang mai krai ka sara Kham Ca pa mawh cao bung kaing Numli Shiem, kheu kawndoe inkix mawh pa teem coi, pa kya ngien, mai pa giex kwang Numli Shiem. Tax Saw Lux chawk mai ah nin "Hoek kawm pex ka aux, ex chix yuh ka mawx?" Sara Kham Ca deeh pawk mai ah nin, "Aux ang pon yuh ceu ka mawx. Kheu ang kix sime ti ot, kieh kix ot dee simie kix ti ot liak" Tax Saw Lux baox ah nin" Kix ot mai aux ang yuh tix. Viang mawh nan aux simie ti deeh tawx kix ka pex. Koe rhawm pex yuh ka mawx, aux simie ti tawng. Aux simie pex deeh yuh kaing yuh tix pa lum la kya ngien kawndoe." Sara Kham Ca deeh tawm lox mai ah nin, " Ang koe dee, son kawm pa hoik lih khankix, ang koe priex, son eei kix, jao an, son sang deeh rieb ka kix ang lai pon, viang mawh nan koe tix ceu, twah pa hoek sax, koe krax kum E.C kawmiti. Dee an, kieh rhawm Tax Saw Lux naog ang naog ang chix ah. Aux tag krai grawng in. Yix tag kum kah ngaix

twah pa hoek sax. Jao an, hoek ka aux, ngaix tix (Jah), twah khaix awawx." Yam Tax Saw Lux hu ka sara Kham Ca ngaix tix (jah), twah khaix, sara Kham Ca ah nin, "Hoik kum kah yix mai hoik tat yix lox dud daux E.C. Ang lai pon rieb kawm inkix tix kaux kawx." Mawh kheu nan, Tax Saw Lux baox yaox tix eei kawndoe inkix, daux pa ang pon krax teem krax coi dee mawx kawx heue.

Ka ang grawng in lih ti mawh , jhak heue, daux 1971 num nhaox, yam saramax Lu Di jah tix kraix khrawm ka kawndoe kix, tix yaong hoik tix yaong, awm lox tawm sara ting Mu La, saramax Lu Di mai sara ting Ai Nap Khun Nyi hoek ti kum kah mai Tax Saw Lux. Yam an, Tax Saw Lux yuh kaing acuyax, cao kaing Pangvai Kakoiye heue. Tax Saw Lux ah nin ka kiex "Khrawm heue. Sawg heue. Aux kawx rom ti sawg. Aux kied gauxrhawm gauxrhi son sang pon lom la kya ngien priex ka kawndoe kix haok huan pa yaox ti kham naing sivai heue".

Kawndoe (50) kaux pa hoik dawg koe mai Tax Saw Lux mai kawndoe (49) kaux pa viex mai saramax Lu Di, phan kleuk ka cub in ra cub, kheu hoik koe (99) kaux, krax ot krax koe kix, lih ti mawh krax nu krax ciien tete heue. Jao an Tax Saw Lux hu ka sara ting Wilian pa mawh sara ceucau daux ceucau Pax Thax Max Nit Chin (ပထမနှစ်ခြင်းအသင်းတော်), veng Lashio, son sang deeh mhaing haktiex pa ot saramax Lu Di mai kawndoe kix voe nhaox heue. Sara ting ah nin, "Ang shiang mai aux. Haktiex in mawh cub sara ting Mu La kix pa tan lu ka Num Li

Shiem. Viang mawh nan aux mhong, mawh son kawn doe vax heue. Jao an, hu ka sara Kham Ca pa shiang mai Num Li Shiem awx.” Jao an Tax Saw Lux deeh hu ka sara Kham Ca ra bawg ti bawg. Sara Kham Ca ah nin, "Aux ang pon tat lox dud tix kaux tix. Aux ka krai ka daux E.C. Phan khix in (30) ngaix uik, koe krax kum E.C. Hoek khix khaix awawx.” Tax Saw Lux kawx hu ka nyiex sara Kham Ca awm pa hoik tawm ka nawh. Sara Kham Ca ah nin, "Hoik tat E.C kix lox dud. Son sang deuh kawndoe daux haktiex in ang chix. Son coh kawx ang chix kheu mawh haktiex pa tan lu pui.” Kheu ang lai pon ka haktiex, kawndoe kix yaox ti ot sikhawp sikhiep daux bawda pa paoh ti deuh daux nyiex Tax Nyi Kom pa mawh haktiex Tax Saw Lux heue. Kheu koe kawn doe kix (100) haoh, Tax Saw Lux yaox ti bieh ka kawndoe, tix plak daux haktiex tix dah pa koe plak krax pangvai (ဝန်ပိုင်လမ်း), glawk (1), veng Lashio. Jao an lih ti mawh bawda laong, bawda seh heue. khaix hoik bieh yuh nan, Tax Saw Lux deuh ka sara Ai Rai pa mawh bawda-uk ot daux meung mau yaong khraox (ပိုင်မော့ရွာသစ်၊ လားရှိုးမြို့နယ်ရှိ) son sang yuh nawh sara ceucuo tan. Khaix hoik deuh ka sara Ai Rai ot tan, Tax Saw Lux jah ti kieh ka saramax Lu Di mawh bawda-uk daux nyiex pleung tix lang pa hoik sum Tax Saw Lux daux haktiex pa koe plak krax pangvai nux heue.

Son sang pon kwang pon giex kawndoe (40) kaux haoh, kheu ang pon saramax Lu Di tix kaux khaing, Tax Saw Lux kok ka saramax Ba Ni mai sara Ngox Khun pa mawh aw mai

aik saramax Lu Di, son sang teem coi ka saramax Lu Di yam hoek kiex ti vi veng Lashio. Kiex ra kaux kawx rieb heue. Mawh kheu nan sara Ngox Khun mai saramax Ba Ni kawx teei beeh glawm bawda-uk ra kaux tix kaux greem saramax Lu Di. Daux bawda laong mawh saramax Iemmatit, saramax Thoe Lux, saramax Xie Xie mai Tax Nyi Kreng pa hoik dawg koe. Daux kix, saramax Iemmatit mawh bawda-uk, mai saramax Thoe Lux mai saramax Xie Xie mawh bawda-uk ra kaux tix kaux, mai Tax Nyi Kreng mawh cao kuik (pleuk) priex heue. Kheu kied sikhawp dee, son bawda laong mai bawda seh, Tax Saw Lux hu ka sara Kham Ca mai deeh mhaing ti liag ka haktiex pa ot kawndoe vax nhaox. Tax Saw Lux ah nin, "Aux ka liag mai sum nyiex, daux haktiex in. Khaix hoik sum nyiex, aux deuh kawndoe kix tin. Phan ang mawh nan rieb ka kawndoe inkix liak. Khaix hoik sum nyiex, aux ka tawx ka pex, tan ka pex.” Sara Kham Ca deeh pawk nin, "Aux ang thieang ka grawng pa hoek ah maix, viang mawh nan, aux ang chix yuh kaing tix kaux tix, kheu yuh aux daux cub daux caw, aux ka krai daux E. C, khaix hoik krai aux daux E.C, aux ka hoek tawx satang ka maix.” Khaix hoik rheung loe khix, sara Kham Ca hoek ka nyiex Tax Saw Lux mai ah nin, "Tax Saw Lux eue, aux lauxrhawm ang E.C rieb kah. Aux simie ti tawx ka maix mie ding kawx ang chix. Aux gauxrhawm ka lox maix, pa sang ah maix ti sum nyiex mai tan lu ka nyiex an, mai maix tawx yix rieb ka kawndoe heue. Grawng pa ah maix ti sum nyiex mai tan lu, chix heue. Viang mawh

nan, ang yix pon rieb ka kawndoe in." Jao an Tax Saw Lux kawx ang lai keud ti tan lu ti sum ti deuh nyiex mai keud nong son kawndoe. Kheu ang dee ot koe, kied yaox ti ot daux krax nu krax ciien pa kied kharhawm kharhi tete heue.

Otkhaix, Tax Saw Lux hu ka veng Yangkon. Yam nawh hoek veng Yangkon, nawh yaox ti sipup Tax Awng Din. Grawh grawng pa yaox ti sipup Tax Awng Din kienie nyiex Tax Awng Din mawh nyiex pa pan peung Tax Saw Lux, yam nawh haok ghaok lih dung yam nawh ot cawng heue. Kawn Tax Awng Din pa kaux Saw Wao mawh paox grawm pa meed mai Tax Saw Lux heue. Yam an kawn Tax Awng Din pa kaux Saw Wao, kheu cheu klup mai nawh, mai tokaux nawh yum tix plak. Jao an Tax Saw Lux tom hu jhak mai tawx riangrao Saw Wao, pa mawh paoxgrawm nawh heue. Yam Tax Awng Din yaox ka Tax Saw Lux, nawh ah nin, "Tax Saw Lux, aux mhong eei maix kawndoe tom nie. Phan rheung sipie sipie ang maix doh pon kham. Dee in, koe cub pa teem coi ka kawndoe. Mawh cub Y.M.C.A heue. Phan hu kum kah mai cub an, phan pon tix kaux ih mhawm, phan pon kao kaux ih lheu mhawm heue." Khaix an Tax Awng Din kok ka Tax Saw Lux hu tau daux lum Y.M.C.A mai kieh yaox ka Karapaing heue. Tax Awng Din krai ka Karapaing tawng grawng Tax Saw Lux, grawng eei kawndoe, grawng ot veng Lashio mai phan chix teem coi, teem coi kah. Y.M.C.A kawx tawx lai tang ka Tax Saw Lux, son sang pon tiem ka grawng kaing yuh nawh, mai kieh Tax Saw Lux tiem lak mat tix piang ce an heue. Khaix

hoik rheung tix khix, Tax Jon Tiex Ji hoek ti kum kah mai Tax Saw Lux daux veng Lashio heue. Jon Tiex Ji krai lao grawng hoek tix ka Tax Saw Lux mai ah nin, "Y.M.C.A ploi aux mawh kosalie. Aux hoek son ah kawndoe kix ti pon krax teem krax coi pa tang maix lai yam hoek maix Yangkon nhaox heue. Aux simie ti yaox kawndoe kix an, mai thawng riang kix mai viex riang kix hu Yangkon, mai aux ka deeh krai grawng pon maix krax teem krax coi mie ding". Mawh kheu nan kok ka bawda laong mai bawda seh mai thawng ka riang kix khawmuik pa koe daux bawda heue. Tax Jon Tiex Ji viex ka riang kawndoe (100)haoh, hu Yangkon. Khaix hoik rheung ra khix, Tax Jon Tiex Ji baox hoek ra bawg ti bawg mai ah nin, "Koe maix kawndoe (100) haoh. Ang yix pon teem khawmuik. Yix kawn ca teem (30)kaux voe ha." Khaix hiok ah nan ing ka Yangkon. Jah yam an, kawndoe (30) kaux tom pon krax teem, mai kawndoe pa kawn deuk (70) kaux haoh, mawh nong Tax Saw Lux pa eei kix. Khaix hoik rheung (6) khix, Tax Jon Tiex Ji baox hoek loe bawg tix bawg. Bawg in, kieh saramax Lu Di yuh heue. Khaix Tax Jon Tiex Ji hoik thawng riang, mai khaix pon lai ting bwanson khaing kawndoe, nawh ah, grawng baox ti tawx krax teem krax coi son kawndoe (10) kaux, mai nawh ing Yangkon heue. Mawh kheu nan kawndoe(40) kaux pon krax teem khaing Y.M.C.A. Yam an kheu baox hoek kawndoe kix, kawndoe kix khawmuik tom koe (120)haoh. Jao an Y.M.C.A tom tawx krax teem son kawndoe (40) kaux, kawn doe pa kawn deuk (80) kaux haoh, mawh Tax Saw Lux pa eei kah.



*Nyiex Sum Tax Saw Lux*

Yam an, Tax Saw Lux sum nyiex ra nyiex, nyiex pa koe ra that daux haktiex pa liag khaing ceu pui Khang pa kaux Tax Khun Sa pa mawh ara loe mhai daux yie heue. Daux nyiex ra lhang an, tix lhang mawh son Tax Yaw Bax pa mawh pux nawh, mai nyiex pa kawndoe an mawh son Tax Yaw Na San pux pa iak nawh heue. Kheu sikhawp dee ot son kawndoe (100) haoh, dux ka kawndoe pa ot bawda laong, bawda seh khawmuik ot daux nyiex pa sum son Tax Yaw Na San heue. Kheu koe ra that, plak piang kieh simex ot, plak greem kieh sibun ot heue. Braok nyiex an, baux sum nyiex priex tix lhang. Jah tom yam an, bawda laong, bawda seh ang lai koe. Khaix hoik kieh kawndoe khawm uik ot daux nyiex bawda an, Tax Saw Lux tom tawx satang ka Y.M.C.A heue. Mawh kheu nan Y.M.C.A kawx hoek ti jhak. Kheu Y.M.C.A kied moh ka nyiex an, Tax Jon Tiex Ji pa mawh kosalie Y.M.C.A ah nin ka Tax Saw Lux "Kied mhawm pa yuh maix. Y.M.C.A simie ti deuh nyiex in ka kawndoe inkix. Nyiex in ngawh mie ding". Tax Saw Lux krai (2) sien (4)

mheeng pa bak ti uik heue. Tax Jon Tiex Ji kawx ah grawng sang tan ka mau in pa hoik uik mai ing ka Yangkon heue. Khaix hoik rheung (6) khix, Tax Jon Tiex Ji deeh hoek ka Tax Saw Lux mai ah nin, "Hoik cox khre ti tawx mau (2) sien (4) mheen. Viang mawh nan, ang mau nyang koe yam in, dha ti teei tix plak ha. Mau pa kawndoe tix plak, yix ka tawx bawg khaix." Khaix hoik luan 6 khix kawx ang mau pa kawndoe die hoek. Viang mhaing yam hoek Tax Jon Tiex Ji kawx, nawh ah grawng ang nyang pon mau. Mawh kheu nan Tax Saw Lux ah nin ka Tax Jon Tiex Ji "Aux hoik pao lox ka pui, grawng krax tan pex heue. Phan pex tan lu, tan khawmuik. Phan pex ang tan lu khawmuik, deeh teei ka mau in (1) sien mai (2) mheen liak." Tax Jon Tiex Ji deeh ah nin, "Aux khyox khaw ka maix son grawng in, phan aux hoek Yangkon, aux ka deeh krai ka kix heue". Viang mawh nan, kheu ang mau baux hoek, Tax Saw Lux kok ka sara ting Ai Nap Khun Nyi pa mawh cao bung kaing Nie Si Voe heue. Tax Saw Lux tawm lox mai ah nin ka sara ting Ai Nap Khun Nyi "Kawndoe mau (1) sien mai (2) mheen pa yaox kix ti tawx ka aux, aux ang tawng grawng ang kix tawx hoek tom yam in. Mawh kheu nan, maix ca hu chawk ka kix liak. Phan kix ang tawx grum grum naog naog, aux ang simie ti teei. Aux simie ti deeh tawx mau kix. Koe ngie ceukaux nong. Tix ngaix sax pui tag ah nin, 'Mawh bawda Y.M.C.A. ' Ceu in aux ang moh." Mawh kheu nan, sara ting Ai Nap Khun Nyi pa mawh cao bung kaing Nie Si Voe hu ka Yangkon mai kum kah mai Y.M.C.A. Khaix hoik kum

kah, Y.M.C.A deeh baox mau (6) mheen. Sara ting Ai Nap Khun Nyi hoek ti ap ka mau (6) mheen an ka daux tawm taix Tax Saw Lux heue. Hoek tom yamin ang lai pon ka mau pa kawn deuk an. Daux 1986 num, kheu saramax Lu Di sim:ie ti lih khaing bawda-uk, Tax Saw Lux tawx kiex lih heue. Khaix hoik lih saramax Lu Di, Tax Saw Lux tom ap nyiex kawndoe vax khawmuik daux tawm taix sara ting Ai Nap Khun Nyi pa mawh cao jhawp kaing daux Nie Si Voe, son sang pon baox toe Nie Si Voe ti yuh heue.


Jah tom 2004 num, tom hoek in singaix, son priex ih priex un kawndoe kix, Tax Yaw Bax+ Yax Khin Win Ma pa mawh pux lih Tax Saw Lux, mhaing mau krax teem ku khix ku khix ka paox meed paox grawng tix pa ot daux veng Lashio, awm pa sibieh rhawm kix ti tawx heue.

## 2. Loe Num Loe Yieh (3/300) Satsana Loi Sam Ngam

### K. Grawh Grawng Lih Koe (3/300) Satsana

Daux 1964 num, khaix hoik ing satsana Amerikan, daux satsana kawn khrit com rawm khang, mawh bawgyam pa yaox ti sipup grawng cao kaing ang koe grum grum naog naog, mai yam dah rhawm dah rhi, mai yam suksag haktiex heue. Jao an ceucau tix ceucau mai tix ceucau ang lai rheung yaox ti sitioe mai paox tix, sara kix kawx ang lai pon ti kum kah mai paox tix, ang lai yaox paox tix, tix kaux la! tix kaux, pie cawng rawg bwan kawx ang lai yaox ti pon haok mhawm mhawm, kheu yaox kix ti to plak seh plak laong, mox tin mox

tan heue. Mawh kheu nan kix yhawm sinyek sinyek (sipie sipie) plak krax yumrhawm plak ju plak khwan heue. Ang die pie mawh an. daux meung Khang khawmuik, cao yuh lai phin, cao ih phin paing phin lung kied nie phao. Jao an kawn nyawm pa sum ju pa laux ju koe tom nie. Kheu sara cao sidiex ang koe grum grum naog naog mai mau khri kawx kheu kied nu ti sawg, ceucau mawx ceucau an, ku ceucau yhawm riang sipie sipie heue. Yam cao kaing kawn khrit com rawm khang kix, yaox ka ceu an, kix kied laux rhawm mai ang lai pon keud grawng krax yuh tix heue. Daux 1977 num, kheu hoik yuh poi ting, hoik ih li kawn khrit naog 100 num, cao kaing kix lih tix yaox, grawng hoik khaw ti yuh son tix ceu ceu heue.



*Sara Ting M.D Khaw Saung Mai Moeng Nawh Mai Kawn Bon Nawh*

Mai kix lih yaox ka hoik hoek bawgyam, son sang sidiex gau lox bwan gauhrhawm gauhrhi Siyiex ka rawb rim rawb bieang tix heue. Viang mawh nan ang yaox ka riang susai, son sang jah ka satsana kaing pa ting in yuh ka mawx. Yam an, daux kaing yuh cao jhawp kaing K.B.C (Ke Bi Si) pa kaux sara ting

Iemjanaw, daux kaing ceucao nawh, nawh yaox tix sipaung pui yum tom nie, daux pui yum kix an, kawnyawm lheu viex, jao ih kix phin paing heue. Mawh kheu nan, jao an, jhak heue, nawh yaox riang susai sonsang lih kaing tix ceu pa mawh kaing saw kaoh vaoh haing kraik ka lox bwan gauxrhawm gauxrhi heue. Sara ting an, yaox ka riang susai, grawng khaw ti yuh satsana 3 num ka jung pui 300 pa ang teei ngawh riang khix tix heue. Nawh tang ka riang susai pa yaox tix ka kawmiti tix bawg hoik tix bawg heue. Yam tang nawh lai ka cubcaw pa shiang mai grawng in, kix ang rieb, mai thiang, mai ah nin “Kaing in tag awm brex pa hax tix vud ngie, mai ex Num Li Khang tag yaox ti kaig tua kheu grawng in, ang doh lih ti mawh eep, ang doh lih ti mawh ien”. Viang mawh nan sara ting Iemjanawh ang laux rhawm tang ka ceu in tix vud tix vud heue. Jao an grawng pa lih ti mawh loe num loe yieh (3/300) kienie sara ting Iemjanaw mawh pa ting ceu tix kaux heue.

Mawh kheu nan, khaix satsana 100 num cie Num Li Khang pa lih ti mawh kaing satsana pa kham mhai sakse pa kraik mai sidiex gau lox bwan gaux rhawm guxrhi, pa yuh loe num mai pa ap pong jung pui loe yieh kienie jah ti yuh daux khix ra, 1978 num tom hoek khix ra 1981 heue. Kaing satsana loe num loe yieh in, mawh pa kied ao min, mai mawh pa kied vieh va tah hu ku dah, mai mawh pa ao min, mai kied haok huan daux Num Li Kawn Khrit Meung Man heue. Daux phuk lai in, mawh nong grawng hoek satsana loe num loe yieh (3/300) daux satsana vax heue.

### **(1) Dee Bleeh Satsana Loe Num Loe Yieh (3/300)**

Dee bleeh loe num loe yieh (3/300) kienie mawh jung pui 300 pa coca ti yuh satsana loe num heue. Loe num kienie yam im Simiang Yesux ka piang haktiex, kheu yuh Nawh kaing satsana loe num, jao an, teei dee bleeh loe num an heue. Loe yieh kienie teei dee bleeh daux camlig khrityan, daux lai Cao Prawng, simin ting aliah mu, awm laug simiang Gideon ka lien loe yieh heue. Simiang Siyiex laug ka lien loe yieh son simiang Gideon, son sang plaux ti tik ka lien Midian keng rheng keng mheen heue.

Mawh kheu nan satsana loe num loe yieh kienie kied kaux cong mai kied koe riang plak krax yumrhawm mai kied haok huan heue. Cubcaw loe num loe yieh (3/300) khankix, kix teei riang, mai ah lai rhax pa to kaux tix mawh lien Gideon khankix, mai lien kawn khrit kix pa ah ti yieh satan heue.

### **(2) Grawng Hoek Loe Num Loe Yieh Daux Satsana Vax Loi Sam Ngam (1981-1991)**

Daux 1980 num, daux meung Shiem caong ma laong, pon jah ti yuh ka satsana Vax heue. Grawng pa pon jah ti yuh ka satsana in kienie kheu Tax Saw Lux pa mawh cao kaing daux ceu pui Vax, kok mai khyox khaw ka cubcaw loe num loe yieh (3/300) heue. Daux phuk lai loe num loe yieh (3/300) cie Numli Khang, pa tiem Iem Di (M.D) Khaw Saung, yaox kaing lai yuh nin “Satsana Vax Meung Shiem Plak Caong Ma Laong”

heue. Otkhaix satsana in, kheu deeh tawx kix ceukaux nawh mawh "Satsana Loi Sam Ngam" jao an, tom lih ti mawh ceukaux "Satsana Loi Sam Ngam" heue.

Cubcaw saramax Khawn Din pa ap pong ti yuh loe num loe yieh (3/300) khaing Num Li Khang, yam kix krai lox bwan gauxrhawm gauxrhi daux yaong Loi Kham, Pang Peng, Nam Lin, Pang Khaw Khre, Nam Luk, mai Ho Tang, cao yaong kix lih ti rieb mai yumrhawm ka Simiang Yesux Chrit heue. Phan tax kie lih ti mawh kawn khrit pui pa ot daux yaong an, lih ti mawh khawmuik heue. Kheu kied phai pui pa lih ti mawh kawn khrit, cao bung kaing pa mawh sara ting M.D Khaw Saung mai sara Lom Daung khaing cubcaw satsana loe num loe yieh (3/300), mai kiex hoek dom mawx dom an dee ot Vax, kawn rai pui sin kix kawx gaux rhawm ti rieb hoek toek bleeh kix heue. Otkhaix kix kum kah tau mai kuad nyiex simiang yaong son satsana in heue. Daux bang kum ting Num Li Khang, yam tang lai mai krai grawng in, jhak heue, daux bang kum an, tat lox dud, son sang yuh ka satsana vax in jah tom 1981 tom hoek 1991 num, daux been 10 num heue. Otkhaix tawx beeh glawm ka sara ting Tu Lum, cao bung kaing, daux Num Li Khang Meung Shiem heue. Mai kix shiao ka sara, sara max Vax pa ot daux veng Lashio heue. Son krax yip krax shiao mai son ngawh krax sara mai saramax Vax kix an, tiblax Numli Khang tawx, tiblax Tax Saw Lux tawx kah heue. Riang khix sara mai saramax mawh 150 plah heue. Yam an, mau 150 plah kub ih son nyiex

ma tix lhang heue.

Kheu bwanson Siyiex, daux II 5-1981 num yaong Loi Sam Ngam ang ah, daux 1983 num yaong Leeng Pok ang ah, mai daux 1984 num yaong Nam Khaox Sin ang ah, lih ti yumrhawm mai rieb ka Simiang Yesux heue. Ceucao Khang, Lashio, sum ka nyiex cawng rawg bwan tix lang, daux ceucao Loi Kham, son mhai ti tawng cie kaing satsana Loi Sam Ngam pa hoik naog 10 num heue. Hoek tom yam in kawn koe cawng rawgbwan an heue.

Daux Satsana Loi Sam Ngam, sara mai sara max pa hoik ap pong ti yuh kaing jhaw Siyiex kienie. . . .

| <b>Ccukaux</b>                 | <b>Yaong</b>                   |
|--------------------------------|--------------------------------|
| ( 1 ) Saramax Khawn Din        | Pang Nawng, Loi Kham           |
| ( 2 ) Sara Ting Sai Ao         | Loi Kham, Nam Kat,<br>ManKang  |
| ( 3 ) Sara Ting Sai Tao Ka     | Loi Kham                       |
| ( 4 ) Sara Ting Yaw Nax        | Man Pok, Nam Luk               |
| ( 5 ) Sara Ting Sai Kat        | Nam Luk                        |
| ( 6 ) Sara Ting Silax Thun     |                                |
| +                              |                                |
| Saramax Ting Rebekkax          | Loi Sam Ngam                   |
| ( 7 ) Sara Ting Ciet Khun      | Nam Khaox Sin,<br>Loi Sam Ngam |
| ( 8 ) Sara Ting Lu Kax         | Nam Khaox Sin                  |
| ( 9 ) Sara Ting Nyox Saik Rong | Loi Kham                       |



(10) Sara Ting Philip Brang Shaong Nam Khaox Sin

(11) Sara Ting Ai Pan Nam Kat

Daux 1986 num, khix 4, 28 ngaix, daux Niesivoe Vax Kawn Khrit Com Rawm pa yuh daux yaong Pengsa, rieb ti teei ka cubcaw ceucao vax kawn khrit com rawm, baux veng Tangyan mawh cub caw tix cub pa lih mawh khaing satsana Loi Sam Ngam pa yuh Num Li Khang mai pa lih mawh khaing satsana Hoe Kong mai Pangyax pa yuh khaing Num Li Yang heue.

Daux 2002 num, khix 4, Num Li Shiem rieb ka baux veng Tangyan mai baux veng Hopang mawh baux veng, daux bang kum rom ting cie Num Li Shiem, daux yaong Na Shio pa mawh daux cubcaw Min baux veng Lashio heue.

Daux 2003 num, Num Li Meung Man (MBC) rieb ti teei baux veng Tangyan mai baux veng Hopang mawh baux veng, daux bang kum rom ting 118 bawg cie Num Li Meung Man daux pa yuh daux Num Li Khang, veng Myit Ji Na nhaox heue.

### 3. Poi Ting Jubeeli (75) Num

Daux 1908 num, ceu pui Vax rieb ka beenli khrityan, jhak heue, daux 1983 num, kheu hoik naog 75 num, yuh poi ting jubeeli (75) num heue. Poi (pwie) ting an, yuh daux meung Shiem caong ma laong, daux veng Hopang, daux ceucao vax kawn khrit com rawm, daux 1983 num khix 4, 17-21 ngaix nhaox heue.

Ka ang nyang bax yuh poi ting an, gwieh mai tawx beeh

glawm kaux mawx kaux an, mai kum kah tau daux been tix khix. daux nyiex Tax Saw Lux yam in heue. Ang joeng mawh an, krax cox lai rhax ang ah, krax cox koi ya ang ah, krax cox cubcaw kawmnyawm cawng Yangkong bing kha ya ang ah, cox khrex tan heue. Lai rhax pa mawh kaing lai "Vax Tox Thang Ni (dee ot Vax) ao daux kao num haoh daux veng daux yaong kawn khrit heue. **Daux 1983 num, yam yuh poi naog 75 num an, mawh yam puing Acuyax mai Bakapax paox tix, tix cub mai tix cub daux pa kied kin heue. Viang mawh nan, yam yuh poi an, pon khyox khaw khawm ra plak, son ang nad kawng ngu lih heue. Poi ting an mawh poi pa pon khrawm ceu pui Vax pa ih li khrityan khawmuik yuh poi tau mai mawh poi ting pa kied ao daux ceu pui Vax ex heue.**

Daux poi ting in, ceu pui Vax pa ot ku dah ku dee pa lih li khrityan, hoek ti viex tix mheen (10000) haoh heue. Ang joeng mawh an, okatha meung Shiem pa kaux Bo Mu Ji Ba Tang mai cabcaw nawh ang ah, mai cao kaing cao kap daux tab daux yie ang ah, hoek ti tawx riang tawx rao heue. Plak cubcaw been yungyi khankix kawx hoek ti tawx riangrao heue. Cubcaw ankix kienie

- (1) Cubcaw Been Yungyi Meung Shiem
- (2) Cubcaw Been Yungyi Ceu Pui Akha  
(Pa viex pa kaux Ami Nyo hoek)
- (3) Cubcaw Been Yungyi Ceu Pui Pa Ox
- (4) Cubcaw Been Yungyi Ceu Pui Min

(5) Cubcaw Been Yungyi Ceu Pui Vax

(6) Cubcaw Sai (ဆဲး) kawx hoek khaing veng Mandale heue.

Cao kaing cao kap kakoiye pa kaux Tax Cao Tiex (Sao Hing), Tax Shia mai Tax Tang (Yaong Brex), mai Tax Sax (Yaong Soi) kawx hoek tawx riang rao heue. Ang joeng pie mawh an sara ting Sam Kam plak katholit (Catholic) kawx hoek heue.

#### 4. Grawh Grawng Rev. Ai Pao Pleek (Sgu)



*Sara Ting Ai Pao Pleek (Sgu)*

Rev. Ai Pao Pleek mawh kawn Rev. Sam Pleek Nap + Yax I Nang Meung, mai keh daux num 9-8-1938 daux yaong Raog heue. Daux pux nan nawh koe kao loe (13) kaux, nawh mawh puke ting kix heue. Daux 1942 num, nawh gau lai shiem mai sara Sam Nao, yaong Nao, Samkien. 1943-1946 num nawh gau lai Vax, lai shiem mai keeing tix daux Meungmau heue. 1947-1948 num, nawh gau lai Man tom pon awng tix 1 tan, daux Meungmau. 1948-1951 num ang yaox ti gau lai kheu sugsak haktiex jao puing Hawx Raoh mai Hawx Paing paox tix. 1952-1954 num gau lai kalapaing, lai man mai lai shiem daux cawng Namli Nawng Pha, Keng Tung Baptist School (KBS) veng Keng Tung tom awng 2 tan. 1954-1963 num gau

lai pingnya daux veng Tharrawaddy Karen High School tom hoek 10 tan (Matriculation) heue.

Mawh kheu sara lhong pa yuh satsana khankix pa mawh ceu pui karapaing kix lih khaing Numli Meungmau, sara lhong Aung Din (Lashio) pa mawh missionary Vax tom tauh maox rhiem (ကြေးနန်းရိတ်) ka nawh deeh kok nawh ing yuh cao giex kaing cawng (Head master) daux Numli Meungmau heue. Mai nawh baux rawg sara cao teem 2 kaux, sara lhong Aung Din ploi sara Lasiet Mu (Yang), mai saramax Mary Chin hoek heue. Daux 1963-1965 num nawh yuh cao giex kaing cawng gau lai (school Headmaster) daux Numli Vax Khrityan Com Rawm Veng Meungmau. Nawh paoh cawng tom hoek 5 tan. Nyawm cawng gau lai koe 200 kaux haoh. kawn nyawm bawda ih priex cao tix koe 60 kaux heue.

Paox pa yuh kaing mai nawh pa mawh sara, saramax khankix

- (1) Sara Ai Pao Pleek Sgu (Cao Kaing Cawng)
- (2) Sara Lasiet (Cao Kaing Cawng Ra Kaux Tix Kaux)
- (3) Saramax Mary Chin
- (4) Sara Ciet Rong
- (5) Sara Ai Rai
- (6) Saramax Ie Na Wu

Daux 1966-1975 num, yuh kaing Acuyax Man, plak lah gee (Trade Co-operation). Naw laux lee tix khaing kaing (re-tire), nawh pon ngawh laux lee (pension) tix khix 120 kyat

heue. Daux 1975-1979 num, yuh kaing acuyax daux cubcaw **Ta Max Wa Ya Max**, veng Hopan heue. Yam yuh kaing tan, kheu pui koeng tix cub tang nawh ka acuyax, nawh yaox ti to ti ot meung Thai kah heue.

Ka ang nawh nyang lih khaing Lashio, 1980 khix 1, 9-10 ngaix, nawh hu kum mai Tax Sawlux mai ah nin "Kliex ka mawh lung ka mawh, phan Man kix rug sau aux laig daux thawng, chaoxrhawm ka kawn simex kawn bun aux 4 kaux, kieh kix yaox ti gau lai mhawm mhawm, rieb kix ot daux bawda cie maix liak. Phan aux lih khaing thawng sax aux lawk deeh pawk bwanson maix". Tax Sawlux kawx laux rhawm kheu nghiit nawh lox nyaw pui, ku ceu khamuik nhie nawh rawg bwan ka Siyiex heue. Otkhaix Tax Saw Lux tao kawn Rev. Ai Pao Pleek khawmuik dee ot Rev. Ai Pao Pleek meung Thai.

Singaix lih nawh khaing Lashio, Tax Saw Lux ce nawh deeh ing plak Hopang, viang mawh nan, Tax Saw Lux mhong hoik to nawh, tom kieh pui hawt sawg ti yaox ka nawh. Jiet caw ti mawh yam lailing nawh daux veng Tong Gyi, nawh sipub pui Tax Saw Lux. Tax Sawlux tawm lox ah nin "Hoik luan lih maix ti to, aux sang tawx kaing ka maix, 5 ceu, phan pon rieb ka ting bwanson, phan maix ang pon rieb teei rhawm cao maix ah heue."

1. Sawg ti yaox Missionary prim Vax.
2. Sawg krax teem son pui pa yuh kaing jhaw Siyiex daux Vax.

(Pie yamin, mau ceuk ex Numli koe 3 mheen kyat haoh heue).

3. Baox thut ex shiao lai rhax vax tom hoek 400 phuk haoh.
4. Sawg krax teem sonsang baox thut Phuk Lai Sigang Khri Pa Prim (Old Testament)
5. Sawg daux krax sonsang pon ploix lox bawn gaux rhawn gaux rhi plak lox vax khaing FEBC Manila Philippine.  
Mawh kheu yaox nawh mawh kaing Simiang Yesux Khrit, nawh tat rhawmrhi tix, prah miex keeing tix, prah moeng kawn tix, prah pux nan tix, to tom sidauh, mai yuh kaing pa tawm Tax Sawlux, kheu mawh Tax Sawlux,
  1. Cao kaing kawmiti cub pa duk thong (U saong mhux kawmiti Okkathax)
  2. Cao priex mau Numli, mai cao sawg mau riang khix cub pa yuh kaing (EC).
  3. Sawg krax teem sonsang yaox kawndoe ti gau pingnya cuyi.
  4. Sum nyiex it, nyiex sawm cub kawndoe daux Lashio, krax byuha.
  5. Pon kraix khrawm kawn khrit vax pa pung prang, deeh mawh tix cub tix caw.
  6. Sonsang tawng kawn khrit rhawmrhi paox tix, nie lheu moh paox tix, thong ex yuh pwie ting tix num, tix yaong, ku num.

Mawh kheu khwan singax singeh paoh dauh rhawm dauh rhi cao kaing ting (Okkathax) ex Tax Sawlux, Tax Sawlux kieh nawh hu ot meung Thai, yuh kaing awm pa tawm nawh heue.

### **K.Grawng Kaing Pa Yuh Awm Lox Pa Tawm Tax Sawlux**

29-2-1980 num, sara Ai Pao Sin viex nawh hu sikah mai Tax Bele (Bill) Young mai miex nawh Ma Ma Lhong Ruthax (Ruth). Kiex khawm miex khawm kawn gauxrhawm kheu hoek nawh sonsang yuh kaing jhaw Siyiex dauh meung Thai son Vax heue. Sonsang pon deeh thut nawh lai rhax vax, Ma Ma Long mai Tax Bele siteo nawh mai sara lhong David Morse, sara lhong an kawx, gauxrhawm ti gau nawh ka cag tiem mai grawng tiem lai rhax heue.

Daux 7-14, 7, 1980, cao bung kaing ting Tax Sawlux, Lashio, kieh sara lhong tix kaux hoek ti tawx mau cai nawh 7280 baht, + 10000 khawm uik caw tix mawh 17280 baht, viang mawh nan, dauh mau 17280 baht nawh pon ngie 5000 baht khaing heue. Mawh kheu nan, yaox ti yuh siliex pui, mai sawm eep prim tix ngaix 3 brie, dauh 4 num khawm thut nawh Lai Rhax Vax heue.

#### **(1) Grawng Thut Lai Rhax Vax**

- \* Bawg 1. Ka dauh 1981 num, hoik pon thut lai rhax vax mai hoik pon yang lai rhax vax been 1000 phuk heue. Meung Man baox yang ti shiao.
- \* Bawg 2. Ka dauh 1995 num, baox pon yang lai rhax vax been 1000 phuk heue.

- \* Bawg 3. ka dauh 2002 num, baox pon yang lai rhax vax been 2000 phuk. Dauh 2008 num, baox yaox kawn khrit meung Hawx baox yang ti shiao.

#### **(2) Grawng Thut Phuk Lai Sigang Khri (Camlig)**

##### **(K) Phuk Lai Sigang Khri Pa Prim (Old Testament)**

Mawh kheu hoik pon cao pa teem pa coi ka ex son plak mau plak khri, Numli Vax meung Thai hoik tiem lai ka Numli Ting Vax Khrityan Com Rawm Lashio mai Numli Ting Khrityan Com Rawm Kengtung ra bawg heue. Mawh kheu pon lai pawk kix grawng ang kix pon hoek, Numli (WCF) mai Sara Sai Khawt tom khaw rhawm, mai tawx beeh glawm ka Tax Sara Sai Khwat, kieh nawh teem ex thut lih plak lox vax heue. Nawh jah ti yuh kaing thut lai dauh num 1990, khix 8, 1 ngaix, tom hoik ka dauh num 1993, khix 10 (October) heue.

Son sang khaw mai Vax khrityan ku cub ku caw, ku numli dauh meung mawx ang ah, mai son sang khaw mai been dauh Cub Rop Rom Lai Sigang Khri (United Bible Society), numli ex Vax ku plak hoik khaw rhawm, mai ploi cub sara khankix hoek dauh meung Thai mai tom deeh rom tix phat, tix cied mai deeh pig mhawm mhawm, mai kieh khaw mai lox vax pa chix Vax plak nie heue.

**(Kh) Grawng Deeh Khrawm Camlig Prim Mai Camlig Khraox**

Phuk Lai Sigang Khri Pa Khraox, gumlox awm pa prim, mawh ngie baox sau ex kaing lai bauh mawx bauh an heue. Lai Yaogyaw mai: lai Lox Kab ang lai cox, hawt awm pa hoik yuh Numli Lashio heue.

**(3) Kaing Jhaw Pa Hoik Yuh Nawh Khankix**

1. Hoik pon kieh Numli Vax Khrityan meung Thai koe tix cub.
2. Hoik pon sum ceucao Vax koe ka daux veng Chiangmai tix mu.
3. Hoik pon kieh Numli Vax sitioe tix mai Numli Ting (CCT) meung Thai.
4. Hoik pon paoh bawda vax daux Chiangmai, meung Thai.
5. 2005 num hoik pon kab Phuk Lai Sigang Pa Prim mai Pa Khraox tau, hoik yang lih 7000 phuk.
6. Hoik pon baox thut, pon cox, pon pig lai rhax vax ra bawg, mai hoik yang lih 2000 phuk.
7. Hoik pon ploi lox bwan gauw rhawm gauwrhi daux cagbhaung ku ngawb, jah ka 1983, khix 6 (June), 1 ngaix tom hoek in singaix heue.

**Lawg (4)**

**TAX SAW LUX MAI KAING HAKTIEIX**

**1. Tax Saw Lux Mai Kaing Haktiex Daux Ceu Pui Min**



*Tax Saw Lux Mai Yax Me Ri*

**K. Grawng Pa Ti Haok Huan Ceu Pui Min**

**(1) Grawng Lih Koe Pa TI**

Jah tom daux 1948 num, khaix hoik pon meung Man, Lut Lat Ye khaing Karapiang, jhak heue, daux num 1948 hoek tom 1962 num, daux (14) num in, ti vud ti cu, shiao been Bali-

madi-mokarasi. Khaix an, jah tom 1962 num hoek tom 1988 num, khix 8, daux 26 ngaix, daux meung Man, deeh shiao been Tawlanye Kaung Si mai been Soshielit heue. Kheu shiao ka been Pa Ti tix ceu ngie, grawng pa ang kawn rai pui sin kix khaw rhawm lih ti kin sipie sipie tix ngaix hoik tix ngaix, mai kheu ang lai gee nyawm ti yuh khawm heue. Daux num an 1988 num, khix 3, kheu yum kawn nyawm cawng Tiex-ka-to pa kaux Maung Phong Maung, kawn rai pui sin kix lheu kin lih ti ang khaw rhawm mai lih ti yuh krax tie feen ka acuyax, jao an, haktiex meung Man lih ti koe krax suksag heue. Kheu krax tie krax feen hoek ku dah ku dee daux haktiex meung Man khawmuik sijaox, acuyax ang lai pon giex kwang ka haktiex heue. Jao an, daux 1988 num, khix 9, 18 ngaix, cubcaw lien khankix teei krax pa kwang siawp sibrawm haktiex ku ceu, mai sum cubcaw tix mawh Naing Ngan Taw Nyeng Vud Pit Pyiea Mhux Di Saok Ye A Phoix (နိုင်ငံတော်ငြိမ်ဝပ်ပိပြားမှုတည်ဆောက်ရေးအဖွဲ့) heue. Kheu hoik teei beeh glawm krax pa kwang siawp sibrawm haktiex yuh nan, ang lai koe been Pa TI tix ceu ngie pa hoik kwang siawp sibrawm haktiex been 26 num nhaox heue.

Daux 1989 num, cubcaw Naing Ngan Taw Nyeng Vud Pit Pyiea Mhux Di Saok Ye A Phoix (နိုင်ငံတော်ငြိမ်ဝပ်ပိပြားမှုတည်ဆောက်ရေးအဖွဲ့), kheu ah ti yuh poi rom ting pa kaux Patizong Di-mo-karasi Athoe Athoe Yoekaux Poi, jao an, pao lox daux meung Man ku dah ku dee son sang tang ti pon makpongting pati plak haktiex pa yuh daux been daux caubcaw Patizong Di-

mo-karasi Athoe Athoe Yoekauxpoi Cingpaxye Kawmishin heue. Kheu acuyax tawx akhwang yuh cubcaw pati plak haktiex, pui pa simie ti yuh kaing plak haktiex mai cao kaing ceu pui khankix pa ot daux meung Man, yuh cubcaw pati plak haktiex son dee tix. mai son ceu pui tix heue. Jao an, Tax Saw Lux mai moeng nawh, awm hoik tuk thung ti yuh ka Pati Plak Haok Huan ceu pui Vax, kiex mex moeng kied koe rhawm son sang yuh ka pati plak haok huan ceu pui Min son ceu pui Min heue.

Mawh kheu nan, Tax Saw Lux mai Yax Meri kok mai kum kah mai cao kaing ceu pui Min, mai pui pa chix cuyi pingnya, mai pui pa grum tawng, mai pui pa khaw ti kok heue. Daux 1989 num, khix 2, 17 ngaix, kosalie pa ot ku dah ku dee, dee ot ceu pui Min hoek ti kum kah heue. Khaix an kosalie khankix kum kah mai paox tix, mai tat lox dud son sang pon yuh pati plak haok huan ceu pui Min heue. Son sang teei ka pati makpongting, yuh ka kawmiti ti vud ti cu awm plak greem heue.

- |                      |                        |
|----------------------|------------------------|
| 1. Tax Awng Tu       | Cao Jhawp Kaing        |
| 2. Tax Yaw E Lax     | Cao Jhawp Kaing Dia    |
| 3. Tax Ca Shi        | Cao Bung kaing         |
| 4. Tax Pho Teng Shin | Cao Bung Kaing Dia (1) |
| 5. Tax Ca U Mu       | Cao Bung Kaing Dia (2) |
| 6. Tax Jaw Ni        | Kawmiti                |
| 7. Tax Ca Ha Shie    | Kawmiti                |
| 8. Tax Ca So         | Kawmiti                |
| 9. Yax Lax Teng      | Kawmiti                |

10. Tax Tang Tun Joi            Kawmiti  
 11. Tax Yaw Nax Tang        Kawmiti

Khaix hoik yuh kawmiti kriem kriem kre kre mhawm mhawm awm plak piang, son sang pon teei ka pati makpongting son Pati Haok Huan Ceu Pui Min, deeh baox tiem ka Been Daux Krax Pa Caw Ti Hawt, mai Been heue. Kawmiti kix viex ka lai pa lo mai hu ka Yang Kong, daux 24 ngaix, khix 2, 1989 num, son sang pon teei pati makpongting heue. Yam hoik hoek veng Yang Kong kum kah grawng pa caw ti cox khankix mai tang lai daux cubcaw pa giex kwang pa kaux Patizong Dimokarasi Athoe Athoe Yoe Kauxpoi Cingpaxye Kawmishin daux 1989 num, khix 2, 27 ngaix heue. Cubcaw pa giex kwang poi ting kawx jhak mai cied awm pa koe been mai tawx akhwang yuh kaing plak haktiex, makpongting nabat (206)-(209) heue. Ceu in mawh ceu pa sum ka Pati Haok Huan Ceu Pui Min awm pa koe been son tawng bee ma haktiex meung Man khawmuik ang joeng mawh bee ma haktiex khawmuik heue. Ceu in mawh ceu pa yaog min ka ceu cad tix, mai ceu pui tix heue.

Didix ceu pui Min kix, ang sax koe akhwang son pon yuh ka pati plak haktiex awm yam in, mai ang sax koe ceu pa pon yuh ka pati plak haktiex tix ceu kawx heue. Yam in awm pui (a) awm ceu pui tang ceu hoik pon ti silah ti viex daux poi rom ting pa kaux Patizong Dimokarasi Athoe Thoe Yoe Kauxpoi. Ceu in kawx mawh pon ceu pui Min kix akhwang ceu pa kied

nu ti pon heue. Phan ah plak tang ceu, (1) kaing plak hak tiex pa ang sax pon tom daux ju tax yiex miex keeing dix, (2) ceu pa koe krax nab krax yam ti tawng ceu pui Min, mai son sang pon yuh krax haok krax huan, (3) ceu pa pon akhwang son ao min ceu pui Min daux bee ma haktiex Man, mai bee ma haktiex khawmuik, (4) ceu pa koe krax koe grawng son sang pon yuh awm ceu pui tang ceu, (5) ceu pa koe krax koe grawng pa ang sax pon tix bawg kawx pa kied koe ngawh jum pa kied nu ti pon, ceu in phwan ceu mawh pon daux pa koe ngawh koe jum tete heue.

**(K) Daux 1990 Num, Grawng Viex Mai Silah Daux Poi Rom Ting**

Daux 1990 num, khix 5, 27 ngaix, acuyax yuh poi rom ting pa kaux Patizong Dimo-karasi Athoe Thoe Yoekaux poi heue. Pati Haok Huan Ceu Pui Min kawx viex mai silah (7) kaux sonsang pon laug ti mawh Lutdaw Kosalie baux veng (7) veng heue. Pui in kix mawh awm plak greem.

- |                         |   |                          |
|-------------------------|---|--------------------------|
| (1) Tax Dieniyieawng    | - | baux veng meung Pin      |
| (2) Tax Pho Teng Shi    | - | baux veng meung Tachilet |
| (3) Tax Ca U            | - | baux veng meung Pyiet    |
| (4) Tax Ma Kux          | - | baux veng Cing Tong      |
| (5) Tax Ting Maung Lwin | - | baux veng meung Khat     |
| (5) Tax Ca Nu           | - | baux veng meung Sat      |
| (7) Tax Ca Tawx         | - | baux veng meung Tong     |

Daux pui inkix, mawh ngie Tax Dieniyieawng tix kaux khaing pa pex daux mie 6407/11728 plah, pa viex mai silah daux Lutdaw Kosalie daux baux veng meung Pin tang Pati Haok Huan Ceu Pui Min heue.

**(Kh) Grawng Yuh Pati Nyilakhan Bawg (1)**

Yam hoek daux 1991 num, yuh Pati Nyilakhan Bawg (1), daux an deeh loh, mai deeh laug ka kawmiti pa khraox awm pa khaw rhawm pui nie, awm koe been Dimo-karasi, son sang viex ceu pui Min khawmuik, mai son sang baux ti kok mai kum kah mai cao kaing ceu pui Min pa koe plak ku dah ku dee, mai pui pa chix pingnya cuyi pui pa grum yaox grum tawng, mai pui pa koe min daux ceu pui Min, mai pui pa khaw ti kok heue. Pati Nyilakhan Bawg (1) an, yuh daux lum Pati Haok Huan Ceu Pui Min nhaox, pa koe lakmat nyiex (39), krax nawng kham, glawk (1), veng Lashio heue.

Ceu kaux kawmiti khraox kienie mawh awm plak greem heue.

- (1) Tax Dieniyieawng - Cao kwang Cao Bung
- (2) Tax Pho Teng Shi - Cao Jhawp Kaing
- (3) Tax Ca U - Cao Bung Kaing Ku Ceu
- (4) Tax Shamoe Lax - Cao Bung Kaing Dia Ku Ceu
- (5) Tax Yawxelax - Cao Bung Kaing(1)
- (6) Tax E Maung - Cao Bung Kaing(2)
- (7) Tax Ca Nu - Cao Bung Kaing(3)

- (8) Tax Ca So - Cao Bung Kaing(4)
- (9) Tax Dieniyiethi - Kawmiti
- (10) Tax Ca Shi - Kawmiti
- (11) Tax Ca Ha Shie - Kawmiti
- (12) Tax Ya Ha - Kawmiti
- (13) Ta Ca Law - Kawmiti
- (14) Yax Lu Me - Kawmiti
- (15) Tax Yu Dax - Kawmiti
- (16) Tax Da Shie - Kawmiti
- (17) Tax Ca Lie - Kawmiti
- (18) Tax Ca U Mhu - Kawmiti

Otkhaix, Tax Ca U pa mawh cao bung kaing ku ceu kheu lih nawh mai ang rhawm moh ti yuh kaing daux Pati, jao an, dee ara nawh, Tax Ca Ha Shie pa mawh kawmiti (3), tom baux toe ti yuh, jah yam an heue.

**(Ng) Grawng Ploi Pati Kosalie Hu Daux Amyota Nyilakhan**

Daux rob rom meung Man, cubcaw acuyax pa kaux Naing Ngan Taw E Chang Ta Ya Ye Nix Phyux Phyoye Kaung Si (နိုင်ငံတော်အေးချမ်းသာယာရေးနှင့်ဖွံ့ဖြိုးရေးကောင်စီ) thung bung ka Amyota Nyilakhan, mai yuh ka Been Daux Krax Pa Caw Meung Ti Hawt (နိုင်ငံတော်ဖွဲ့စည်းပုံအခြေခံဥပဒေကြမ်း) son sang pon ti yip shiao daux meung Man heue. Bang kum ting an, jah ti yuh daux 1993 num, khix 1, 9 ngaix heue. Daux Nyilakhan an viex cubcaw ku



cub, mai yuh heue. Cubcaw inkix kienie

- (1) Cubcaw Kosalie pa laug pui meung khaing poi rom ting
- (2) Cubcaw kosalie khaing Pati plak haktiex khankix
- (3) Cubcaw kosalie khaing cao yuh kaing acuyax khankix
- (4) Cubcaw kosalie khaing cao yuh kaing plak ku ceu
- (5) Cubcaw kosalie khaing cao yuh nie, cao yuh ma
- (6) Cubcaw kosalie khaing ceu pui khankix pa ot daux meung Man
- (7) Cubcaw kosalie khaing pui pa chix ngai lai, mai pui pa chix cuyi pingnya khankix
- (8) Cubcaw kosalie khaing pa caw ti kok daux cub daux caw khankix

Daux Amyota Nyilakhan an, Pati Haok Huan Ceu Pui Min kawx ploi kosalie pon kaux hu heue. Pui ankix kienie mawh

- |                      |   |                       |
|----------------------|---|-----------------------|
| (1) Tax Dieniyieawng | - | Cao Kawng Cao Bung    |
| (2) Tax Cahashie     | - | Cao Bung Kaing Ku Ceu |
| (3) Tax Yawxelax     | - | Cao Bung Kaing (1)    |
| (4) Tax Cashi        | - | Kawmiti heue.         |

Yam yuh Amyota Nyilakhan, Tax Dieniyieawng pa hu tang Pati Haok Huan Ceu Pui Min kienie kheu kaing pa tokaux tix, nawh lih khaing Pati mai hu ot meung tang meung heue. Tax Yawxelax kawx kheu hoik riex ju nawh, nawh yum ka ang bang kum nyang hoik heue. Jah tom 1993 num hoek tom 2007 num, daux (14) num an, pa haok kum kah daux Amyota Nyilakhan pa

jah tom hoek pa ghoik kienie mawh ngie Tax Cahashie, mai Tax Ca Shi heue. Yam kiex haok Amyota Nyilakhan an kawx awm cub caw tang cub ceu pa caw ti yuh kawx yuh, lai pa caw ti kraix khrawm kawx khrawm, ceu pa caw ti tang mai phat kawx phat heue.

### **Kh. Grawng Sum Pati Ra Bawg Tix Bawg**

Daux 2010 num, cubcaw pa kaux Naing Ngan Taw E Chang Ta Ya Ye Nix Phyu Phyo Ye Kawngsi (acuyax) yuh ka cubcaw pa giex kwang poi ting pa kaux Pithaungsux Yoekauxpoi Kawmishin, son sang pon yuh Poi Rom Ting (အထွေထွေ ရွေးကောက်ပွဲ) daux meung heue. Pithaungsux Yoekauxpoi Kawmishin plih lai lih grawng been, mai grawng been pa caw ti yuh, mai grawng been pa caw ti hawt yuh, khaix an, pao lox ka pui meung grawng pon ti sum pati plak haktiex, phan simie ti sum Pati plak haktiex heue.

Mawh kheu nan, Tax Saw Lux kok mai sikah mai Tax Dieniyiethi pa mawh kawmiti daux Pati Haok Huan Ceu Pui Min, daux phong, son sang deeh baux yuh ti sum "Pati Haok Huan Ceu Pui Min" heue. Yam an, mawh yam ot Tax Saw Lux nyiex pa tokaux tix, daux veng Pang Sang, meung Vax heue. Tax Dieniyiethi kawx kheu mawh nawh pa viex rhawm ti yuh kaing son sang haok huan ceu pui Min tix, nawh prah ka kaing yuh tix mai hoek ti kum kah mai Tax Saw Lux heue. Yam kum kah kiex tau, Tax Saw Lux taing lox ka nawh son sang hu kum

kah mai cao kaing, Pati Haok Huan Ceu Pui Min nhaox, grawng lo ti yuh, ang yuh ang chix, son meung ang ah, son ceu pui ang ah, mai grawng tawx acuyax akhwang kah, khaix an son sang deeh hoek tau mai kix, mai baox kum kah mai nawh (Tax Saw Lux) heue.

Khaix Tax Dieniyiethi hoik ing khaing Tax Saw Lux, awm lox taing Tax Saw Lux, mai nawh hu kum kah mai cao kaing tiblah pa yuh kaing daux Pati Haok Huan Ceu Pui Min nhaox, daux meung Shiem plak caong ma laong, khaix an, nawh hoek tau baox tix bawg mai Tax Ca Ha Shie pa mawh cao bung kaing ku ceu, son sang kum tau mai Tax Saw Lux heue. Khaix Tax Ca Ha Shie mai Tax Dieniyiethi hoik kum kah mai Tax Saw Lux son sang deeh sum ti yuh ka Pati Haok Huan Ceu Pui Min baox tix bawg, Tax Saw Lux taing lox ceu pa lo khankix ka kiex heue. Pa ting ceu hu chawck cheng ti yaox rhawm pa koe cao kaing pa laig daux cubcaw Pati Haok Huan Ceu Pui Min nhaox, mai pui meung kix, grawng pa sang ah ti sum ti yuh Pati Haok Huan Ceu Pui Min bawg in heue.

Khaix hoik ing Tax Dieniyiethi mai Tax Ca Ha Shie khaing Tax Saw Lux, kiex hu chawck cheng ti yaox cao kaing, mai pui pa laig cubcaw Pati Haok Huan Ceu Pui Min nhaox daux yaong ku yaong, veng ku veng, daux meung shiem plak lih singaix heue. Yam kiex hoik chawck cheng ka pui meung (Min) pa ot meung Shiem plak lih singaix, kiex yaox ti tawng rhawm koe kix grawng awm hoik viex kix yam jah, dee ghoik kawx koe

rhawm ti viex ang ah, mai phan deeh sum Pati Haok Huan Ceu Pui Min. baox koe rhawm ti yuh tau ang ah, phan tang makpongting Pati kienie kheu hoik dex dawd bawg yam, khrawm ti yuh mai cubcaw Pati pa ot daux meung Shiem plak caong ma laong ti vud ha ang ah heue.

Kheu hoik tawng ka rhawm pa koe ceu pui Min pa ot meung Shiem plak lih singaix, Tax Ca Ha Shie, Tax Dieniyiethi, Tax Ai Sang (Been Buddah), mai Tax Ya Po hoek ti kum kah mai Tax Saw Lux daux nyiex Tax Saw Lux, veng Pang Sang, haktiex Vax, mai kix kum kah tau grawng pa yaox kix, grawng pa ce kix heue. Khaix hoik kum kah kix yuh nan, kix deeh cox ceix Been Daux Krax Pa Caw Ti Hawi (ဖွဲ့စည်းပုံအခြေခံဥပဒေ) pa hoik dawg koe nhaox son sang deeh pon sum ka Pati Haok Huan Ceu Pui Min heue. Daux bawg yam nari an, son sang deeh pon sum ka Pati ang ah, son sang baox ti pon khrawm ti thung bung ka Pati ang ah laug ka Pati kawmiti (4) kaux ti vud ti cu heue. Pui an kix kienie

- |                     |                             |
|---------------------|-----------------------------|
| (1) Tax Dieniyiethi | Cao Kwang Cao Bung          |
| (2) Tax Cahashie    | Cao Jhawp Kaing Dia         |
| (3) Tax Yawtax      | Cao Jhawp Kaing             |
| (4) Tax Ya Po       | Cao Bung Kaing Ku Ceu heue. |

Khaix hoik laug ka kawmiti (4) kaux ti vud ti cu an, Tax Saw Lux tom tawx mau (50) sien (mau Man) daux tawm taix, cao kwang cao bung, cao jhawp kaing mai cao bung kaing heue.

Otkhaix, yam hoek daux veng Tangyan, veng Lashio, mai

veng Shien Vi, deeh khrawm ti yuh ka Kawmiti pa kawn deuk khankix. Otkhaix, kheu Tax Ya Po lih khaing Pati, cao bung kaing dee ara nawh, Tax Tiex Win tom baox toe ti yuh heue. Jao an, son sang pon Pati makpongting yamin, carang kawmiti kienie mawh awm plak greem heue.

- (1) Tax Dieniyiethi - Cao kwang Cao Bung
- (2) Tax Cahashie - Cao Jhawp Kaing
- (3) Tax Yawtax - Cao Jhawp Kaing Dia
- (4) Tax Tiex Win - Cao Bung Kaing Ku Ceu
- (5) Tax Ca Tawx - Cao Bung Kaing Dia ku Ceu(1)
- (6) Tax Ca Tawx (TY) - Cao Bung Kaing Dia Ku Ceu(2)
- (7) Yax Ma Ri - Cao Bung Kaing (1)
- (8) Tax Tang Lwin - Cao Bung Kaing (2)
- (9) Tax Jaw Ni - Cao Bung Kaing (3)
- (10) Tax Ya Shie - Cao Bung Kaing (4)
- (11) Tax Ya Tiex - Paho Kawmiti
- (12) Tax Xeli Shie - Paho Kawmiti
- (13) Tax Daye - Paho Kawmiti
- (14) Tax Ca Xe - Paho Kawmiti
- (15) Tax Ca Si - Paho Kawmiti
- (16) Tax Daye - Paho Kawmiti
- (Meung Kaung)
- (17) Tax Ca Co - Paho Kawmiti
- (18) Tax Ca Nu - Paho Kawmiti
- (19) Tax Ca Yaw - Paho Kawmiti
- (20) Tax Lu Tie - Paho Kawmiti

**(1) Grawng Hu Tang Lai Ka Veng Nepitaw, Son Sang Pon Sum Pati**

Khaix hoik tiem ti deuh num riah been Pati (ပိတောက်စည်းပုံအခြေခံဥပဒေမူကြမ်း) cie Pati Hoak Huan Ceu Pui Min.

mai baox yuh cum(တံဆိပ်), mai chi (အလံ) Pati, jhak heue, cao jhawp kaing Tax Ca Ha Shie mai cao jhawp kaing ra kaux tix kaux Tax Yawtax hu ka veng Nepitaw khaing veng Lashio, daux 21. 4, 2010 ngaix plak bo heue. Daux 23-4-2010 ngaix hu daux lum kawmishin (Commission) mai tang lai son sang pon akhwang ti sum Pati haktiex heue. Khaix hoik deuh ti een ka lai tang an, Pithaungsux Yoe Kaux Poi Kawmishin (ပြည်ထောင်စုရွေးကောက်ပွဲကော်မရှင်), pao lox Pati Haok Huan Ceu Pui Min mawh Pati Haktiex pa yuh daux been heue. Pati latmat nambat mawh nambat (3) heue.

**(2) Grawng Dux Ka Lum Ting**

Daux 1989 num nhaox, paoh ka lum ting Pati Haok Huan Ceu Min, daux nambat nyiex (39), krax nawng kham, glawk (1), veng Lashio heue. Viang mawh nan, jah tom 19, 4, 2010 num, deeh paoh ka lum ting Pati Haok Huan Ceu Pui Min daux numbat nyiex (43), krax parami, glawk (1), veng Lashio heue.



*Nyiex Lum Khraox*

**(3) Grawng Viex Mai Silah Daux Patizong Dimokarasi Athoethoe Yoekaux Poi Daux 2010 Num**

Daux 7, 12, 2010 ngaix, Pati Haok Huan Ceu Pui Min viex mai silah Lut Daw Kosalie (12) kaux dux Lut Daw dee mawx dee an daux Patizong Dimokarasi Athoethoe Yoekauxpoi mai pex daux Pinie Lut Daw Mie Sandax Nie (2), (လွတ်တော်မဲဆန္ဒနယ်(၂)) daux veng Miex Mang heue. Ceukaux pa pex daux Pi-nie Lut Daw Kosalie kienie mawh Yax Mari heue.



*Yax Mari*

**(4) Grawng Viex Mai Silah Daux Japhyiet Yoekaux Poi (ကြားဖြတ်ရွေးကောက်ပွဲ)**

Daux 1, 4, 2010 num, acuyax pao lox sang ah ti yuh poi rom ting pa kaux Japhyiet Yoekauxpoi, son dee lut daw (43) dee pa yi heue. Poi rom ting Japhyiet Yoekauxpoi in, mawh bawgyam pa kied laig rhawm kawn rai pui sin pa ot daux meung Man mai simiang bee ma haktiex khawmuik . Grawng pa laig rhawm awm in kienie mawh kheu viex "Amyo-ta Dimokarasi Aphwoix Choex" (အမျိုးသားဒီမိုကရေစီအဖွဲ့ချုပ်) mai cao kaing cub kix pa kaux Daw Awng San Su Ji (ဒေါ်အောင်ဆန်းစုကြည်) pa pex 85%, daux 1990 num, daux Patizong Dimokarasi Yoekauxpoi nhaox

heue. Ang joeng mawh an, mawh yam pau pui ti jhak ka mawh poi rom ting pa yuh daux krax rah krax see lie? ang mawh lie? Son dee lut daw (43) dee pa yi in, Pati (17) Pati viex mai silah daux baux veng lut daw pa yi daux meung Man ku dah ku dee heue.

Pati in kix kienie

1. Taing Yi Ta Si Long Nyi Nyut Ye Pati  
(တိုင်းရင်းသားစည်းလုံးညီညွတ်ရေးပါတီ)
2. Pati Haok Huan Ceu Min  
(လားဟူအမျိုးသားဖွံ့ဖြိုးတိုးတက်ရေးပါတီ)
3. Kokan Dimokarasi Nix Nyi Nyut Ye Pati  
(ကိုးကန့်ဒီမိုကရေစီနှင့်ညီညွတ်ရေးပါတီ)
4. Pa Ox Amyota Aphwoix Choex  
(ပအိုဝ်းအမျိုးသားအဖွဲ့ချုပ်)
5. Dimokriettit Pati (Myanmar)  
(ဒီမိုကရက်တစ်ပါတီ (မြန်မာ))
6. Mun Deta Long Saiya Dimokarasi Pati  
(မွန်ဒေသလုံးဆိုင်ရာဒီမိုကရေစီပါတီ)
7. Shan Taing Yita Mya Dimokriettit Pati  
(ရှမ်းတိုင်းရင်းသားများဒီမိုကရေစီပါတီ)
8. Amyota Naing Ngan Ye Mahamet Mya Aphwoix Choex  
(အမျိုးသားနိုင်ငံရေးမဟာမိတ်များအဖွဲ့ချုပ်)
9. Khittit Pi Tux Pati  
(ခေတ်သစ်ပြည်သူ့ပါတီ)

10. Pi Thaung Sux Cax Khaing Ye Nix Phyt Phyo Ye Pati  
(ပြည်ထောင်စုကြံ့ခိုင်ရေးနှင့်ဖွံ့ဖြိုးရေးပါတီ)
  11. Amyota Dimokarasi In A Sux  
(အမျိုးသားဒီမိုကရေစီအင်အားစု)
  12. Pi Tux Dimokarasi Pati  
(ပြည်သူ့ဒီမိုကရေစီပါတီ)
  13. Amyota Dimokarasi Pati Tit  
(အမျိုးသားဒီမိုကရေစီပါတီသစ်)
  14. Nyi Nyut Ye Nix Nyeng Chan Ye Pati  
(ညီညွတ်ရေးနှင့်ငြိမ်းချမ်းရေးပါတီ)
  15. Amyota Dimokarasi Aphwoix Choex  
(အမျိုးသားဒီမိုကရေစီအဖွဲ့ချုပ်)
  16. Myanmar Lux Baung Tit Dimokiettit Pati  
(မြန်မာ့လူ့ဘောင်သစ်ဒီမိုကရက်တစ်ပါတီ)
  17. Myanmar Amyota Kun Griet  
(မြန်မာ့အမျိုးသားကွန်ဂရက်)
- Daux poi rom ting pa kaux Ja Phyiet Yoekaux Poi in, son dee tix dee pa yi pa mawh Amyota Lut Daw Mie Sandax Nie nam bat (3), pa num piang meung Shiem caong ma laong, daux baux veng (5) veng pa mawh baux veng Lashio, Shien Vi, Kon Long, Mong Yie mai Tangyan, Tax Yaw Tax viex mai silah tang Pati Haok Huan Ceu Min heue. Son dee tix dee pa yi in, Pati (5) Pati viex mai silah heue. Pati inkix kienie mawh
- (1) Pati Haok Huan Ceu Min
  - (2) Pi Thaung Sux Cax Khaing Ye Nix Phyt Phyo Ye Pati

- (3) Amyota Dimokarasi Aphwoix Choex
  - (4) Shan Taing Yita Mya Dimokriettit Pati
  - (5) Ko Kan Dimokarasi Nix Nyi Nyut Ye Pati heue.
- Ka ang nyang bax yuh poi rom ting in Maw Dang Janie (မော်ဒန်ဂျာနယ်), Myanmar Taing Janie (မြန်မာတိုင်းဂျာနယ်), VOA pa ploi lox daux cag bhaung, Sikaing Niek (Sky Net) pa ploi riang im, mai pui ting daux lum Amerikan pa kaux Dogla Sonnek (Douglas Sonnek), hoek yaox mai chawk cheng, mai kum kah tau mai Tax Yaw Tax heue. Jao sipiag in, tawng bee ma meung Man ang joeng mawh tawng bee ma haktiex ka Pati Haok Huan Ceu Min heue. Ceu in kienie mawh bwanson kheu viex mai silah daux poi rom ting in heue.
- Daux Pati (5) Pati pa viex mai silah ka daux poi rom ting, son dee tix dee pa yi pa mawh Amyota Lut Daw Mie Sandax Nie nambat (3), pa num piang meung Shiem caong ma laong, daux baux veng (5) veng in, mawh Shan Taing Yita Mya Dimokriettit Pati pa pex heue. Daux meung Man ku dah ku dee, son dee lut daw (43) dee pa yi, yam Pati (17) Pati viex mai silah kienie Shan Taing Yita Mya Dimokriettit Pati tom pex dee (1) dee, mai Pi Thaung Sux Cax Khaing Ye Nix Phyt Phyo Ye Pati tom pex dee (1) dee, mai dee(41)dee pa kawn deuk mawh ngie Amyota Dimokrasi Aphwoix Choex pa pex khawmuik heue.

**(5) Poi Rom Ting Pati Bawg (2)**

Daux 5-7, 7, 2012 ngaix, yuh ka poi rom ting bawg (2) pa kaux amyota nyilakhan ra bawg tix bawg, daux lum Pati Haok Huan Ceu Min, glawk (5), veng Tangyan heue. Daux poi rom ting an, hoek kum kosalie (100) khaing baux veng (12) veng heue. Pui inkix kienie mawh (1) baux veng Cing Tong (3) kaux, (2) baux veng Tachilek (4) kaux, (3) baux veng Mong Pin (6) kaux, (4) baux veng Mong Ton (3) kaux, (5) baux veng Mong Sat (5) kaux, (6) baux veng Miex Mang (1) kaux, (7) baux veng Lashio (11) kaux, (8) baux veng Shien Vi (3) kaux, (9) baux veng Hopang (2) kaux, (10) baux veng Mong Nawng (6) kaux , (11) baux veng Mong Yie (1) kaux, (12) baux veng Tangyan (55) kaux heue. Kosalie inkix khawmuik yaox ceep kix ka kraung ceep ceu pui tix, mai viex rhawm viex rhi kum kah tau mai paox ti daux bang kum in heue.

Cao tiem lai kawx kied viex rhawm son sang viex mai tiem daux phuk lai grawng Tax Saw Lux in, grawng pa kum kah kix, mai rhawm kosalie kix, mai kaing pa bax kix ti yuh khankix, mai carang ceukaux kosalie pa laug kix daux bang kum in heue. Son sang pon haok daux bang kum in, yam cao tiem lai mhaing akhwang ka Tax Yaw Tax pa mawh cao jhawp kaing dia nhaox, yam in cao jhawp kaing, nawh sang lang mai krai grawng phan mawh ceu pui Min, pui mawx kawx pon haok mai pon tawx krax keud tix, mai pon kum kah, mai grawng mawh krax kum pa sidawng ti yaox pa ang koe krax mox krax

klip, viang mawh nan son sang viex ceu pui Min ku dah ku dee, mawh ngie kosalie (5) kaux tang baux veng tix veng, pa pon tawx mie (ဲ) son kaing pa tat lox dud heue. Cao tiem lai kawx kheu hoik pon akhwang haok bang kum, mai nawh tom pon haok ka bang kum ra bawg tix bawg in tom hoik loe singaix heue.

Daux bang kum ra ngaix tix ngaix, yam krai Tax Yaw Tax ka grawng cao tiem lai son sang tawng pui pa hoek daux bang kum kix ka cao tiem lai, lox nawh kieh cao tiem lai sigraung kah heue. Grawh grawng nawh kheu ah nawh nin "Kaw in mawh pa sang ah tix tiem lai been ceu pui Min (လားဟူသမိုင်း) heue. Cao tiem lai ang ecn ka pa keud pot jun pot ding an, viang mawh nan, Tax Saw Lux mai Pati Haok Huan Ceu Min (a) Pati Haok Huan Ceu Min mai Tax Saw Lux ang doh pon goih (gwieh) tix bawg kawx.

Cao tiem lai simie ti kieh pui pa phat lai in kukaux tawng grawng cub jung pui (3) cub. Cub in (3) cub kienie

- (1) Cub pui pa ang tawng grawh grawng pa lih ti mawh. (ဖြစ်ပျက်နေသည့်အရာကို မသိသောသူများ)
- (2) Cub pui pa jhak awm poi ka grawh grawng pa lih ti mawh (ဖြစ်ပျက်နေသည့်အရာကို ပွဲကြည့်ပရိတ်သတ်ကဲ့သို့ ကြည့်သောသူများ)
- (3) Cub pui pa yuh pa lih ti mawh son pon lih ti mawh. (ဖြစ်ပျက်နေသည့်အရာကို ဖြစ်ပျက်အောင်လုပ်သောသူများ)

Simiang ting meung American pa kaux Tax Lin Gon ah nin "Yam phan Siyiex ti ka jung pui ang mawh son sang im

nawh ti vud ti cu, viang mawh nan phan ka jung pui son sang im leng ju leng phan heue". Jao an, ceu pa yuh ex ku ceu, ang mawh gie gie going going. Ceu pa yuh ex ku ceu, caw ti jah ti yuh im, leng ju leng phan, mai caw ex ti yuh son nyiexma ex, son paox ceu paox cad ex, son ceu pui ex, mai son meung ex heue.

Yam keud cao tiem lai dee raux dee mox ka grawng in, yaox ka mawh Tax Saw Lux pa yuh kaing daux been ceu pui Min, awm mhaik tix mu pa koe daux makut tix lon, mai baox tix mawh dawg rong tix rong, ang joeng mawh an, nawh mawh pui pa paoh ngai pui hun, mai mawh cao pa jah ti sum ka cubcaw pa ang koe ang chix daux ceu pui tix, mai nawh shiao ka kraung khrai mau khri cao tix daux pa viex rhawm son koe bwanson son ceu pui tix heue. Cao tiem lai keud dee raux dee mox ka kaing haktiex mawh awm camaox, awm bhaung pa ang chix sawg krax kaing krax caong. Ang joeng mawh an awm pui pa sawg ti kaong ka shiang paing, shiang raoh, shiang klai, mai awm pa yaox ex pai awm dee singai heue. Viang mawh nan, phan ex rug pon, lih ti mawh shiang pa ang pon tat ngawh jum heue. Mawh kheu nan, daux phuk lai in, simie ti yaog min ka Tax Saw Lux kheu jah nawh ti yuh kaing haktiex daux been ceu pui Min pa ang pon tat ngawh jum son ceu pui Min khawm uik, mai son meung tix heue.

Pui pa yuh kaing haktiex ang mawh pui koeng pa ang kaux sijax ka meung tix. Viang mawh nan, pui an kix mawh pui pa

kied moh ka tokaux tix, nyiexma tix, ceu pui tix, meung tix, mai haktiex ot tix heue. Dee bleeh kienie pui pa kieh tokaux cao tix haok huan, pui pa kieh rawb bieang tix haok huan, pui pa kieh ceu pui tix haok huan, mawh pui pa kieh meung tix haok huan heue. Krax makmi, mai krax haok huan meung tix meung, shiang mai krax laig mau, mai ceu pa koe kraung khrai, mai ceu pa koe pingnya cie pui tix kaux pa ot daux meung an heue. Cubcaw pa yuh kaing haktiex pa laoh pa lie pa mhawm pa mhiem tete telai kienie ang mawh son sang teei siawp sibrawm haktiex, viang mawh nan, mawh cubcaw pa coca ti yuh ka beeh glawm tix ceu daux pa ih rhawm rhi khri mau paox tix heue. Beeh glawm cubcaw pa yuh kaing haktiex kienie mawh kix pa coca ti yuh kaing kawm rai pui sin plak krax lai gee ang ah, plak krax ot krax koe ang ah, plak krax haok huan plak kuceu ang ah, plak krax paoh ngai ka ceu pa ang ex chix yaox, pa ang ex kox tawng ka dong tix ang ah heue. Cubcaw pui pa yuh kaing haktiex mawh pui yuh ka mawx? Pui pa yuh kaing haktiex mawh pui kukaux pa ot daux meung pa tokaux tix heue. Maix ka mawh, aux ka pon mawh heue. Mawh kheu nan, ex kukaux yaox ex tix yuh kaing meung tix heue. Viang mawh nan, pui tiblax tix yieh son tidaix phwan 85%, ang tawng pa tokaux ti mawh pa yuh kaing haktiex heue. Kix chix ah mawh cao tix, cao yuh lai gee, cao yuh ma, kaong, nie, mai sara cao sidiex, mai pui pa yuh kaing daux lum heue. Tete telai daux kaing haktiex, ex viex kukaux heue. Phan tiag lox, daux meung tix meung yaox ti

viex pui pa grum tawng khawmuik, mai pui pa chix pingnya khawmuik, mai cao mi mai pui sia khawmuik, mai ceu pui khawmuik, jhak heue, tom pon chix sum heue. Jao an, ceu pa lih mawh ka daux meung ex khawmuik, ex ang pon ngawm ti jhak awm cao jhak poi, ex ang pon ngawm ti tawx riangrao awm cao jhak poi, ex ang pon via tete heue. Meung tix meung, daux kaing haktiex chix pon kieh kawn rai pui sin haok huan, mai hot sia heue. Ex pa mawh ceu pui Min (a) Vax, ang doh pon via daux been haktiex pa tie pa loh meung ex (ပြောင်းလဲနေသော ကျွန်ုပ်တို့၏ နိုင်ငံရေးတွင်) heue. Daux been pa tie pa loh kaing haktiex daux meung ex yam in, cao tiem lai simie ti tawx riangrao ang lai dcuk tix kaux kawx yuh kaing tau daux kaing haktiex daux meung ot ex heue. Phan yuh nan tom pon viex daux amyota lut daw mai pinie lut daw, jao an, tom pon yuh son koe bwan son grum grum naog naog daux ceu pui tix, mai meung tix heue. Ex kawx awm ceu pui tang ceu lo ti yuh awm yuh ceu pui tang ceu heue. Phan ang yuh nan, tag yaox krax sum krax nai pa ang pon tat ngawh jum,, mai pa ang doh pon haktiex awm pon ceu pui tang ceu tix haktiex heue. Phan kham yam im ju ex, kawn khien ti pon khu rhawm tix, ceu in, mawh pa deuh ex sin ngao pa ang mhawm pa ang mhiem ka kawn praix kawn saux kawn sex ex, mai kix yaox ti kham leng lang ju tix khawm heue. Jao an kaing pa yuh ex, kaux mawx kaux an, lih ti mawh been ot cao ex မိမိ၏သမိုင်း, been ceu pui ex မိမိ၏ လူမျိုးသမိုင်း, been meung ex မိမိနိုင်ငံ၏ သမိုင်း, been haktiex (ကမ္ဘာ့သမိုင်း) heue. Mawh kheu nan

kaing pa yuh Tax Saw Lux mawh been ceu pui Min (a) Vax daux been ceu pui Min (a) Vax tix ceu heue. Ex kawx kheu viex ex daux been ceu pui Min (a) Vax simie ti tawx riang tawx rao son sang teem coi mai yuh tau, shiao pingya cuyi riangdi mai mau khri awm pa hoik koe ex been glawm son sang haok huan ceu pui Min (a) Vax ex khawmuik. Grawng pa viex maix daux been ceu pui Min (a) Vax, tag im leng ju leng phan (jheeng jheeng), mai grawng pa viex maix kawx tag koe dee tix dah daux been ceu pui Min (a) Vax heue.

Ceu pa ang sax pon ex akhwang daux ju Tax Yiex Miex Keeing ex dix, yam in Tax Saw Lux + Daw Me Ri, mai kuad song ex khankix hoik pon teei daux pa nu pa cien plak ku ceu heue. Ceu akhwang pa mhawm in, ex caw deeh yaox ti toe ti tawx ka kawn praix, kawn saux, kawn sex, mai kawn sai ex heue. Ceu akhwang pa mhawm in, son pon nieb map yuh ex ka piang pui tang kaux tix kaux kaux ang mawh, viang mawh nan, mawh son sang pon tawx ex ceu pa mhawm son ceu pui tix, mai son meung tix heue. Sara long plak kawn khrit tix kaux chawk mai ah nin ka Tax Dienithi pa mawh pa yuh kaing daux Pati Haok Huan Ceu Pui Min "Hoik yuh maix daux Pati Haok Huan Ceu Pui Min 20 num in, hoik pon maix ceu pa tix? Tax Dienithi deeh pawk lox mai ah nin "Paw ti chawk hoik pon aux mie ding. Chawk ngie hoik uik aux mie ding." Lox in kied rug mawh tete heue. Pui pa rah mai yuh kaing haktiex khankix tawx ju tix son sang haok huan, mai makmi meung tix mawh pa ting ceu



son meung tix heue. Grawng pa laux rhawm ex tix ceu yam in, ka pui pa yuh kaing haktiex pa tawng pui tom nie pa ot daux meung Man kienie ang mawh pa mhawm, ce ka kix mawh pui hai pui meuk pui koeng ka meung @ cao pa nyaw glaw daux pa pon yuh tix heue. Ceu in caw ex ti pon goih mhawm mhawm, mai ang lai via tix kaux kawx daux kaing haktiex mai coca ti yuh daux rhawm pa rah tau awawx.

**(K) Grawng Deeh Loh Paho Kawmiti**

Daux poi rom ting ra ngaix tix ngaix pa yuh Pati Haok Huan Ceu Pui Min, kosalie (100) kaux, haok kum kah tang baux veng (12) veng mai kix deeh laug ka kawmiti khraox ngaix an heue. Pa deeh laug kix awm plak greem.

**- Cao kwang Cao Bung Khankix**

- |                  |          |
|------------------|----------|
| (1) Tax Saw Lux  | Lashio   |
| (2) Tax Dienithi | Tangyan  |
| (3) Tax Cahashie | Lashio   |
| (4) Tax Cashi    | Mong Sat |



*Tax Saw Lux*



*Tax Dienithi*



*Tax Cahashie*



*Tax Cashi*

**- Paho Kawmiti Khankix**

| <b>Ceu Kaux</b>   | <b>Beeh Glawm</b>             | <b>Dee Ot</b> |
|-------------------|-------------------------------|---------------|
| 1. Tax Yawtax     | Cao Jhawp Kaing               | Lashio        |
| 2. Tax Hietix     | Cao Jhawp Kaing dia           | Mong Pin      |
| 3. Tax Tiex Wing  | Cao Bung Kaing Ku Ceu         | Shien Vi      |
| 4. Tax Ca Tawx    | Cao Bung Kaing ku Ceu dia(1)  | Tangyan       |
| 5. Tax Ca Bo      | Cao Bung Kaing Ku Ceu dia(2)  | Mong Ton      |
| 6. Tax Jo Zie     | Cao Bung Kaing Lum Ting(1)    | Mong Sat      |
| 7. Tax Ca Law     | Cao Bung Kaing Lum Ting(2)    | Mong Sat      |
| 8. Tax Shi Mon    | Cao Bung Kaing Lum Ting(3)    | Lashio        |
| 9. Tax Ca Tawx    | Cao Bung Kaing Lum Ting(4)    | Lashio        |
| 10. Tax Yaw Tax   | Cao Priex Sin                 | Lashio        |
| 11. Yax Ma Ri     | Cao Giex Carang (1)           | Lashio        |
| 12. Tax A Tawx    | Cao Giex Carang (2)           | Shien Vi      |
| 13. Yax Etida Mit | Cao Ciet Carang(1)            | Mong Pin      |
| 14. Yax Ca Yaw    | Cao Ciet Carang (2)           | Lashio        |
| 15. Tax Ca Ga Zaw | Cao Ciet Carang (3)           | Miex Mang     |
| 16. Tax Lu Ta     | Kawmiti Plak Kaing Haktiex    | Tachilet      |
| 17. Tax Win Le    | Kawmiti Plak Kaing Haktiex    | Mong Naong    |
| 18. Tax Ca Bo     | Kawmiti Plak Krax Ot Krax Koe | Mong Khat     |
| 19. Tax Le Xe     | Kawmiti Plak Krax Ot Krax Koe | Cing Tong     |
| 20. Tax Win Mit   | Kawmiti Pa Kwang Kre          | Shien Vi      |



*Tax Yawtax*



*Tax Hietix*



*Tax Tiex Wing*



*Tax Ca Tawx*



*Tax Ca Bo*



*Tax Jo Zie*



*Tax Ca Law*




*Tax Shi Mon*



*Tax Ca Tawx*



*Yax Ma Ri*




*Tax A Tawx*



*Yax Etida Mit*




*Tax Ca Yaw*



*Tax Ca Ga Zaw*



*Tax Lu Ta*



*Tax Win Le*



*Tax Ca Bo*



*Tax Le Xe*



*Tax Win Mit*

Grawng pa keud pot jun pot pa yuh ka poi rom ting ra bawg tix bawg Pati Haok Huan Ceu Pui Min in kienie, mawh son sang pon viex ceu pui Min khawmuik, mai mawh son sang pon laug ceu pui Min khawmuik ka paho kawmiti pa khraox, mawh son sang pon yuh krax haok krax huan ceu pui Min plak ku ceu grum grum naog naog, mai son sang pon tat lox grawng kaing hu sivoe ngai, mai son sang meed paox tix, tix kaux lai tix kaux daux cub daux caw, mai son sang pon tawx riang rao ka paox tix, tix kaux lai tix kaux, mai son sang deeh pon keud tau grawng krax iak riang mai krax koe riang, mai son sang pon sawg ka pui pa koe pingnya mai pa chix pingnya, mai son sang pon meed ceu pui Min khawmuik ka Pati Haok Huan Ceu Pui Min heue.

Paho kawmiti in, ju nawh mawh (5) num heue. Mai tat lox dud sang yuh poi naog (25) num cie Pati Haok Huan Ceu Pui Min, daux 28 ngaix khix 2, 2014 num sax heue. Ang joeng mawh in, baox grum rhawm tat lox dud son yuh poi rub rom ting loe bawg tix bawg, daux meung Shiem plak lih singaix, daux veng Mong Sat heue. Phan deuh lum ting Pati Ceu Pui Min, daux meung Shiem plak lih singaix, sang deuh daux veng Mong Sat heue.

## 2. Tax Saw Lux Mai Kaing Haktiex Daux Ceu Pui Vax

### K. Grawng Pa Ti Haok Huan Ceu Vax

Daux 1988 num, khix 8, singaix 18, lien kix teei siawp

sibrawm haktiex daux meung Man heue. Khaix an, awm lox pa mhaing kawn rai pui sin kix, acuyax (lien) tawx akhwang yuh cubcaw pati plak haktiex mai tawx akhwang pati yuh makpongting daux pa koe been, awm mawh patizon dimoikrasi heue. Ceu pui Khang, Yang, Kaya, Chang, Mon, Shiem, Rakhaing, Mon, In Da, Da Nux, Pa Ox, mai Plawng kix yuh cubcaw pati plak haktiex, awm pa koe been, mai kix pao lox son sang tawng ceu pui tix heue.

Jao an, Tax Saw Lux ploi Tax Ai Ngeen Sa hu ka Tax Cao Nyi Lai, mai Tax Bo Lai Kham pa mawh simiang ex plak haktiex Vax, son sang pon yuh Cubcaw Pati Haok Huan Ceu Vax ex heue. Tax Bo Lai Kham kawx khaw rhawm mai tawm lox ka Tax Ai Ngeen Sa hu ka Tax Saw Lux son sang pon yuh cub yuh caw pati haktiex daux bawgyam pa yaox ti yuh heue. Mawh kheu nan daux 1989, khix 1, 12 ngaix, Tax Saw Lux kraix khrawm ka pui 19 kaux awm plak greem, mai yuh cubcaw "Pati Haok Huan Ceu Vax, pa mawh cub pa ang koe ang chix, pa ang koe ang hoik son ceu pui Vax heue. Ceukaux 19 kaux inkix kienie---

**Ceukaux**

**Beeh Glawm**

(1) Tax Saw Gerdan (a)

Tax Ai Kat

(2) Tax Saw Nyut

Cao Jhawp Kaing

Cao Jhawp Kaing Dia

|                             |                           |
|-----------------------------|---------------------------|
| ( 3 ) Tax Jip Seng          | Cao Bung Kaing Ku Ceu     |
| ( 4 ) Tax Sam Sau Ka        | Cao Bung Kaing Ku Ceu (1) |
| ( 5 ) Tax Yosiep Thun       | Cao Bung Kaing Ku Ceu (2) |
| ( 6 ) Tax Ngox Nap          | Cao Bung Kaing (1)        |
| ( 7 ) Tax Khun Sam Yawn Bra | Cao Bung Kaing (2)        |
| ( 8 ) Tax Nyi Nap           | Cao Bung Kaing (3)        |
| ( 9 ) Tax Ciet Seng         | Cao Bung Kaing (4)        |
| (10) Tax Ai Khai            | Kawmiti                   |
| (11) Tax Sam Saik           | Kawmiti                   |
| (12) Tax Ai Pao             | Kawmiti                   |
| (13) Tax Log Ka             | Kawmiti                   |
| (14) Tax Sang Nap           | Kawmiti                   |
| (15) Tax Ai Rai             | Kawmiti                   |
| (16) Tax Sai Tao            | Kawmiti                   |
| (17) Tax Ngox Ka            | Kawmiti                   |
| (18) Tax Nyi Pao            | Kawmiti                   |
| (19) Tax Sai Lin            | Kawmiti                   |

Daux 1989 num, khix 1, 31 ngaix, daux veng Yangon, yam Tax Sam Sau Ka pa mawh cao bung kaing ku ceu (1) tang lai daux Patizong Dimokrasi Athoethoe Yoekauxpoi Cingpaxye Kawmishin, jhak heue, pie daux bo an 8 nari (taix), acuyax pao lox daux cag bhaung khaing lai simin (190/89), son sang tawng bee ma hatiex khawmuik heue. Mai tat ti deuh daux lai mhai pati lai simin (187), daux 2-2-89 ngaix lai mhai 1/YKP, 1/ KMY cie Patizong Dimokrasi Athoethoe Yoekauxpoi Cingpaxye Kawmishin heue.

“ဝ” အမျိုးသား ဖွံ့ဖြိုးတိုးတက်ရေးပါတီ

မှတ်ပုံ တင်ခွင့်ပြု

ရန်ကင်း ၁၉၉၅ ခု

ရှမ်းပြည်နယ်၊ လားရှိုးမြို့ (၁) ရပ်ကွက်၊ ဗျူဟာလမ်း၊ အမှတ် (၅၂) တွင် ဖွင့်လှစ်ထားရှိသော “ဝ” အမျိုးသား ဖွံ့ဖြိုးတိုးတက်ရေး ပါတီ (Wa National Development Party) ကို ၁၉၈၉ ခုနှစ်၊ ဇန်နဝါရီလ ၃၀ ရက်နေ့မှစ၍ နိုင်ငံရေးပါတီများ မှတ်ပုံတင်ခြင်း ဥပဒေပုဒ်မ ၅ ပုဒ်မခွဲ (က) နှင့်အညီ မှတ်ပုံတင်ခွင့်ပြုကြောင်း ပါတီစုံ ဝိသိုကရစ် အထွေထွေ ရွေးကောက်ပွဲ ဣင်းပရေး ထော်မရှင်က ကြေညာချက်အမှတ် (၁၉၀) ဖြင့် ထုတ်ပြန်ကြေညာခဲ့ပါသည်။

“ဝ” အမျိုးသား ဖွံ့ဖြိုးတိုးတက်ရေး ပါတီတွင် အောက်ပါ ဝဟို အုပ်စုအမှတ်စဉ် ကော်မတီဝင်များဖြင့် ဖွဲ့စည်းကြောင်း သတင်းရရှိသည်-

- |   |                                  |
|---|----------------------------------|
| (၁) ဦးစောဂရေဒန်(ခ)ဦးထိုက်ထပ်            | ဥက္ကဋ္ဌ                          |
| (၂) ဦးစောညွန့်                          | ဒု-ဥက္ကဋ္ဌ                       |
| (၃) ဦးလှဝိစိမ်း                         | အထွေထွေ အတွင်းရေးမှူး            |
| (၄) ဦးဆန်းဆောင်းကား                     | တွဲဖက် အထွေထွေ အတွင်းရေးမှူး (၁) |
| (၅) ဦးလှိုင်ဇော်ထွန်း                   | (၂)                              |
| (၆) ဦးငို နှစ်                          | အတွင်းရေးမှူး (၁)                |
| (၇) ဦးခွန်ဆန်းယွန်းတရား(သမိုင်း(၈)နှစ်) | (၂)                              |
| (၈) ဦးညိုနှစ် (ရူပဗေဒ(၈)နှစ်)           | (၃)                              |
| (၉) ဦးကျော်စိန်                         | (၄)                              |
| (၁၀) ဦးထိုက်ခိုင်                       | ဗဟိုကော်မတီဝင်                   |
| (၁၁) ဦးဆန်းဆိုက်(ရက္ခဗေဒ(၈)နှစ်)        | ၊                                |
| (၁၂) ဦးထိုက်ပေါင်း(သတ္တဗေဒ(၄)နှစ်)      | ၊                                |
| (၁၃) ဦးလှိုင်ကား                        | ၊                                |
| (၁၄) ဦးဆန်စု                            | ၊                                |
| (၁၅) ဦးထိုက်ခိုင်                       | ၊                                |
| (၁၆) ဦးဆိုင်တောင်း                      | ၊                                |
| (၁၇) ဦးခေါင်ကား                         | ၊                                |
| (၁၈) ဦးညိုပေါင်း                        | ၊                                |
| (၁၉) ဦးဆိုင်လင်း                        | ၊                                |

Khaix hoik rheung 1 num, yam yuh bang kum ting Pati Haok Huan Ceu Vax, kawmiti tiblax laux tix, mai tiblax deeh loh heue. Yam deeh cox ka kawmiti khraox, Tax Saw Philip (a)

ပြည်ထောင်စု မြန်မာနိုင်ငံတော်  
ပါတီစုံဝိသိုကရစ် အထွေထွေရွေးကောက်ပွဲ  
ဣင်းပရေးကော်မရှင်

ကြေညာချက်အမှတ်(၁၉၀)

(၁၃၅၀ ပြည့်နှစ်၊ ပြာသိုထပြည့်ကျော် ၁၀ ရက်)

(၁၉၈၉ ခုနှစ်၊ ဇန်နဝါရီလ ၃၀ ရက်)

အကြောင်းအရာ၊ “ဝ” အမျိုးသား ဖွံ့ဖြိုးတိုးတက်ရေး ပါတီ ( Wa National Development Party) ကို မှတ်ပုံ တင်ခွင့်ပြုခြင်း။

ရှမ်းပြည်နယ်၊ လားရှိုးမြို့ (၁) ရပ်ကွက်၊ ဗျူဟာလမ်း၊ အမှတ်(၅၂) တွင် ဖွင့်လှစ်ထားရှိသော “ဝ” အမျိုးသား ဖွံ့ဖြိုးတိုးတက်ရေးပါတီ (Wa National Development Party) ကို ၁၉၈၉ ခုနှစ်၊ ဇန်နဝါရီလ ၃၀ ရက်နေ့မှစ၍ နိုင်ငံရေးပါတီများ မှတ်ပုံ တင်ခြင်း ဥပဒေပုဒ်မ ၅ ပုဒ်မခွဲ (က) နှင့်အညီ မှတ်ပုံ တင်ခွင့် ပြုလိုက်ကြောင်း ကြေညာအပ်ပါသည်။  
အမိန့်အရ-

(အေးမောင်)  
အတွင်းရေးမှူး

Tax Philip Sang deeh mawh cao kwang cao bung, pa hoik mawh ara Datax Pati Paho Kawmiti nhaox, mai Tax Ma Kop deeh mawh cao jhawp kaing, pa hoik mawh cao bung kaing daux Pati Yunit (Cing Tong) nhaox, mai Tax Nyi Pleek (Hopang) deeh mawh cao bung kaing heue. Daux Bang Kum Ting Amyota Nyilakhan pa jah ti yuh daux 1993 num hoek 2007 num, son sang pon lih phuk lai Been Daux Krax Pa Caw Ti Hawt Meung Man, daux 2008 num, kosalie ceu pui Vax tom haok (14) kaux, daux (14) kaux an, Pati Haok Huan Ceu Vax (5) kaux, awm plak greem.

- |                     |             |
|---------------------|-------------|
| (1) Tax Ma Kop      | (Cing Tong) |
| (2) Tax Philip Sang | (Lashio)    |
| (3) Tax Nyi Pleek   | (Hopang)    |
| (4) Tax Yosiep Thun | (Hopang)    |
| (5) Tax Sam Sau Ka  | (Lashio)    |

## Lawg (5)

### TAX SAW LUX MAI CEU PUI VAX

Piang haktiex, kawn pui khankix kheu tang siyox gawng lua, rawm, haktiex, priex klawng mai dee krax ot krax koe tix kaux lai tix kaux, jhak heue, lai, been yungyi, mai krax pa chix pingnya kawx tang siyox ti mie nyao phao. Viang tang siyox mie ting kawx son kraix khrawm ti priex ka been yungyi krax ot krax koe pa ang ex pon tat ngawh jum khankix koe beeh glawm pa ting ceu ka ex heue. Lox sikah, lai mai been yungyi pa moh ex khankix, phan ang tang siyox mai been haktiex mai phan ang tang siyox mai pa koe bwanson son pui hun, ex caw ti kraix khrawm ti priex mai baox yuh pa hkraox baux ju mawx baux ju an son ang dah khaix pui heue. Daux pa ang tik ang vud been yungyi pa yuh tax, yiex, miex, keeing khankix, son mawh pa pon deuh ex pa ang pon tat ngawh jum ka son kawn praix ex sax, ex caw ti kraix khrawm ti priex mai baox yuh pa khraox

baux ju mawx baux ju an heue.

Poi (Pwie) pa yuh ex khix mawx khix an ngaix mawx ngaix an ang ah, been yungyi tax yiex meix keeing ex ang ah, been krai kuad kix ang ah, lox kab kuad kix ang ah, poi haok nyiex khraox nyiex ngha ang ah, poi ku paox ang ah, poi krax kliex krax nyah ang ah, ex caw tix phaw daux pa ang tik ang vud pa yuh tax yiex miex keeing ex dix mai yuh pa khraox daux pa laig rhawm ex, daux krax pa moh ex mai daux been krax ot krax koe ex baux ju mawx baux ju an heue.

#### 1. Been Yungyi Ceu Pui Vax

Didix, daux ceu pui ku ceu, mai jung pui ku kaux, koe been yungyi pa tokaux tix heue. Viang koe kawx, ceu pui ti blah ang priex mai ang shiao ka been yungyi cie tix mai shiao ka been yungyi ceu pui tang ceu awm ceu pui cie tix, jao an kawn praix kix ang lai tawng been yungyi ceu pui cie tix heue. Been yungyi tax yiex miex keeing ex ang lo ti priex mai hawt ti yuh khawm uik heue. Tiblah ex khaw ti priex mai hawt tix yuh kriem kriem kre kre, tiblah ex khaw tix cox baux ju mawx baux ju an mai tiblah ex caw ti tik heue. Phan ah lox tiag kienie daux ceu pui Vax, ceu cad pa kid kaing khankix caw ti tik ka been kid kaing heue. Viang mawh nan, been mhawm pa koe bwanson, son pui hun, pa yuh tax yiex miex keeing ex dix, lo ti kraix khrawm mai priex, mai mhai daux ce daux lai son ang grai tix ceu kawx heue. Mawh kheu nan, been yungyi, awm

mawh ceu pa ang koe ang chix son haok huan ceu pui ku cub, mai been yungyi an kawx lo acuyax kix ti tawk cum (အသိအမှတ်ပြု) kah heue.

Daux 1967 num, yam tawx acuyax beeh glawm cawng uk ka Tax Saw Lux daux cawng Pangvai, Tax Myo Lwin pa mawh myo uk Pangvai nhie Tax Saw Lux yuh ka kawmiti cubcaw been yungyi ceu pui Vax son pon ti kraix khrawm priex ka been ih Vax, mai been yungyi Vax heue. Kawmiti ankix kienie

- |                                |                     |
|--------------------------------|---------------------|
| 1. Tax Saw Lux                 | Cao Jhawp Kaing     |
| 2. Tax Lam Soi                 | Cao Jhawp Kaing dia |
| 3. Tax Ai Nap, Yaong Lah       | Cao Bung Kaing      |
| 4. Tax Seen, Yaong Gawng       | Kawmiti             |
| 5. Tax Kie Kreung, Pieang Pang | Kawmiti             |
| 6. Tax Prawng Rang, Yaong Pang | Kawmiti             |
| 7. Tax Sam Seng, Pang Vai      | Kawmiti heue.       |

Khaix hoik yuh cub yuh caw awm plak piang, mai tang cub an ka daux lum been yungyi ceu pui meung heue. Daux 1968, khix 12, ngaix 20, acuyax tawk cum ka cub an, mawh cubcaw been yungyi ceu pui Vax, meung Man heue. Jah tom yam an cubcaw been yungyi ceu pui Vax, meung Man, yuh kaing mai krawk khrawm ti priex ka been yungyi ex Vax, krax graoh krax thia, mai lai lox leng ex Vax heue. Ang joeng mawh an, kheu tawx acuyax kix beeh glawm, jah ti kraix khrawm been ex Vax, mai been krax ot krax koe ex Vax heue.

## 2. Grawng Riieang Khix Been Yungyi Ceu Pui Vax

### K. Grawng Yuh Riieang Khix Been Yungyi Ceu Pui Vax

Daux 1969 num, Tax Saw Lux thung bung ka cubcaw yungyi ceu pui Vax mai kraix khrawm ka ceu kaux singaix pa shiao ex Vax mai lox sikah been yuhgyi ex Vax son yuh ka riieang khix ceu pui Vax ex heue. Yam nawh kraix khrawm ceu an, nawh hu kum kah mai tax kuad pa riex ju kix, mai bawg tiblax kok kix hoek kum kah mai tix, mai teei ka grawng pa ah kix heue. Plak nie, nawh teei grawng pa ah Tax Cao Tiex pa ot haktiex Sao Hing, Tax Cien Song pa ot haktiex Vax Leen, Tax Lam Soi, Tax Kie Kreung, Tax Prawng Rang mai Tax Seen pa mawh cubcaw yungyi ceu pui Vax pa ot haktiex Sao Pha heue.

Daux 1969 num, yam nawh hoek meung Mau kawx, baox khrawm ka ceukaux singaix mai khix pa shiao plak haktiex yaong Soi khaing Tax Sax mai Tax Tao heue. Otkhaix kok ti kum kah mai Tax Khun Seu pa ot haktiex Yaong Ru dee long Khua, Muik Raix, mai Tax kuad pa riex ju pa ot tan khankix, mai plak beenli khrityan pa kaux sara Ai Nap, sara Nyi Seu, Tax Sai Tao, Tax Lam Nap, mai sara lhong Sam Pleek daux meung Mau heue. Ang joeng mawh an kraix khrawm ka ceu kaux singaix mai khix pa shiao plak haktiex yaong Leen, mai Gawng Leen khaing Tax Mawk Kham ang ah, khaing Tax Khun Sam pa ot haktiex Pang Long, Na Vi ang ah heue. Ceu kaux singaix mai khix pa shiao plak Pang Long Na Vi kienie tang siyox ceex khaing haktiex tang dah heue. Viang mawh nan

riieang khix been yungyi ceu pui Vax yam in, mawh pa kraix khrawm khaing ceukaux singaix, khix pa shiao pui hun heue.

Daux 1973-74 num, yam Tax Saw Lux hoek Lashio kawx deeh baox khrawm ra bawg tix bawg heue. Yam in kawx chawk ka Tax vat lhong Vax pa ih beenli buddah ang ah, sara lhong pa ih beenli katolit ang ah, sara lhong pa ih beenli khriyian ang ah, simiang Yaong Soi pa kaux Tax Tao, mai Tax Sax ang ah, simiang Yaong Brex pa kaux Tax Sia, mai Tax Tang ang ah, simiang Sao Hing pa kaux Tax Cao Tiex ang ah, simiang Yaong Raok pa kaux Tax Khun Nyi ang ah, Tax Lam Nap, Bo Maung, Bo Laig U, Ma Ha Sang, mai Ma Ha Pingnya kix uik heue.

Daux 1989 num, khix tix hoek khix pon, baox ti kum kah mai kuad nyiex simiang yaong baox tix bawg awm pa koe plak piang, son sang mawh riieang khix pa mhawm heue. Khaix hoik cied mhawm mhawm mai laug ka pa sidu khankix, viang ceukaux singaix, khix pa shiao ceu pui Vax koe kawx, son tix vong twah ang koe heue. Jao an kied nu ti mie nyao phao. Mawh kheu nan, son sang pon ka ceukaux tix vong twah pa ang nyang koe an, Tax Saw Lux kum kah mai sara lhong Sam Pleek, sara lhong Yaw Su Chin, sara lhong Ai Meung, sara lhong Ai Sang, sara lhong A Wu mai sara Ciet Rong heue. Yam kum kah mai kix, nawh mhong pa ah kix awm plak greem heue.

Daux 1908 num, khix 4, ngaix 17, khaix Tax Ai Rong hoik com rawm plak bo, yam ngawm ti sikah mai Tax Makietyang, Tax Makietyang ah nin "Ceu kaux ngaix mawx ngaix an tix vong

twah koe plak ceu pui Karapiang mai ceu pui Man, viang mawh nan plak ceu pui Vax ang nyang sax koe. Daux beenli khriyian koe grawng pa phan pa daux ngaix tix tom hoek ngaix aliah heue. Ka singaix khankix pa phan Siyiex, ex kok ceukaux ngaix tix mawh singaix jah kheu mawh ngaix jah, kok ceukaux ngaix ra mawh singaix kaw kheu mawh ngaix kaw, kok ceu kaux ngaix loe mawh singaix pang kheu mawh ngaix pang, kok ceukaux ngaix pon mawh singaix riieang kheu mawh ngaix riieang, kok ceukaux ngaix phwan mawh singaix luan kheu mawh ngaix luan, kok ceukaux ngaix liah mawh singaix dum kheu mawh ngaix dum, mai kok ceukaux ngaix aliah mawh singaix laux kheu mawh ngaix laux heue. Mawh kheu nan ex tat lox son sang pon shiao ex ceukaux singaix pa ang nyang sax koe daux ceu pui Vax ex nin, Jah Kaw, Pang, Rieang, Luan, Dum mai Laux awawx". Yam Tax Ai Rong mai kuad kie kix mhong lox ah nawh, mai kix grum rhawm mai tat lox son sang shiao ka ceukaux singaix an heue. Viang mawh nan ceukaux singaix an kheu shiao Tax Ai Rong mai pui pa ih beenli khriyian nong nong, ceukaux singaix an dex sang grai heue.

Mawh kheu nan, Tax Saw Lux deeh shiao ka ceukaux singaix an son tix vong twah pa hoik grum rhawm Tax Makietyang, Tax Ai Rong mai kuad song kix daux 1908 num khix 4, ngaix 17 dix, pa ang sax koe daux riieang khix been yungyi ceu pui Vax heue. Jah tom 1969 num hoek 1989 num, daux 20 num in, ceu pa yaox ti kraix khrawm ceukaux singaix

mai ceukaux khix pa shiao been yungyi vax ex pa pon khaing kuad nyiex simiang yaong kix, tom yaox jah ti pon plih lih daux 1990 num nhaox heue.

**Kh. Krax Grawng Shiao Riieang Khix Been Yungyi Ceu Pui Vax**

Daux riieang khix been yungyi ceu pui Vax pa yuh Tax ex dix, koe singaix mai num pa yuh ti deuh tosat 12 mu, mai koe ceu kaux 10 ceu pa yuh ti deuh ka ngaix 10 ngaix heue. Ka ngaix mai num pa yuh ti deuh tosat 12 mu an, awm hoik lai loh ti shiao tix num hoik tix num, mai yam yuh lai gee, yam hu krax, yam yuh poi ku paox, yam yuh krax lu krax tan, yam sipaung pui yum, yam rhuat simie ma, yam rhuat simie nghox, yam sum simie, yam sawg dee son sang jah ti yuh ma, yam soh ma, yam keeig ma, yam liag ia, lig, krak, moi, yam sum nyiex mai yam cox nyiex khankix, jhak ka tosat 12 mu an mai laug ka ngaix pa mhawm heue. Ka ceukaux 10 ceu pa yuh ti deuh ngaix 10 ngaix an, shiao yam sum ceukaux kawn nghie heue. Phan ah lox tiag kienie phan kawn simex Ai ex keh ngaix Rai, ex chix sum ceukaux nawh mawh Ai Rai heue. Mawh kheu nan riieang khix been yungyi ceu pui Vax ex, ang koe ang chix, mawh pa kied koe bwanson heue.

**- Ceukaux Ngaix 10 Ngaix, Mai Tosat 12 Mu Cie Been Yungyi Ceu Pui Vax**

| <b>Ceukaux Ngaix 10 Ngaix</b> | <b>Tosat 12 Mu</b> |
|-------------------------------|--------------------|
| 1. Ngaix Rai                  | 1. Brung           |
| 2. Ngaix Meung                | 2. Pex             |
| 3. Ngaix Pleek                | 3. Rao Khaox       |
| 4. Ngaix Kat                  | 4. Ia              |
| 5. Ngaix Khwat                | 5. Sox             |
| 6. Ngaix Rong                 | 6. Lig             |
| 7. Ngaix Tao                  | 7. Kiang           |
| 8. Ngaix Ka                   | 8. Moi             |
| 9. Ngaix Kap                  | 9. Sivai           |
| 10. Ngaix Nap                 | 10. Kang Koi       |
|                               | 11. Siyawng        |
|                               | 12. Siuing         |

**- Grawng Pa Tiag Ti Yaox Riieang Khix Pa Shiao Ceu Pui Vax mai Riieang Khix Kara (Kam Pha).**

| <b>Ceukaux Khix Ceu Pui Vax</b> | <b>Ceukaux Khix Kara</b> |
|---------------------------------|--------------------------|
| (1) Khix Gla                    | December/January         |
| (2) Khix Glim                   | January/February         |
| (3) Khix Grawn                  | February/March           |
| (4) Khix Gre                    | March/April              |
| (5) Khix Nai                    | April/May                |
| (6) Khix Jhai                   | May/ June                |



|                 |                   |
|-----------------|-------------------|
| (7) Khix Mu     | June/ July        |
| (8) Khix Pai    | July/ August      |
| (9) Khix Sao    | August/September  |
| (10) Khix Klah  | September/October |
| (11) Khix Pe    | October/November  |
| (12) Khix Taing | November/December |

**- Kaing Yuh Ceu Pui Vax Awm Riieang Khix Daux Pa Num Priex Klawng**

- Daux khix Taing, mawh khix pa sigrah kaing, mai heem rawm, mai yuh krax lu krax tan krax nap krax yam ka pui pa riex ju kix heue.
- Daux Khix Glim mai Khix Grawn mawh yam kaong rawng, yuh rawng mai yuh krawg heue.
- Daux Khix Gre mawh khix sum nyiex, soh ma heue.
- Daux Khix Nai mawh khix keeig ma, soh ma heue.
- Daux Khix Jhai mawh khix rhuat simie, yuh poi rieb lhiex mai khix dex goig an yuh poi khawm yaong, poi tan lu ka phi, son sang nie lih nghox koi heue. Dee tiblah pa mawh dee pa ih ka been kid kaing mawh khix kid kaing heue.
- Daux Khix Mu mai Khix Pai mawh khix soh ma, mai khix yuh poi pa grheu ka phi pa ang mhawm khankix lih khaing yaong heue.
- Daux Khix Sao, mawh khix pa tan lu ka phi pau gawng mai phi pau ma, son sang lih mhawm nghox koi kix, mai son

sang pon luad luan khaing krax pa ih sim sai, to tiag, mai viag kawng kix heue.

**3. Grawh Grawng Ceu Pui Vax**

Ceu pui Vax hoek daux menug Man mai ceu pui Mon mai ceu pui Plawng daux B.C 600 dix. Jah tom B.C 200 num tom hoek been A.D 110 num, ceu pui Vax prung prang ti ot kudah pa mawh plak lih singaix metung Man, mai caong ma seh mai caong ma lhaong meung Thai heue. Kix baox lih mai hu caong ma seh meung Man mai ot, mai sum veng mai yaong dee dex rawm klawng Eyawadi (ဧရာဝတီမြစ်) rawm klawng Sit Taong (စစ်တောင်းမြစ်), mai rawm Sikrong heue. Veng pa hoik dawg koe dix kienie mawh veng Tathong. Khaix ceu pui Mon mai ceu pui Vax ang lai ih rhawm paox tix, kix gwieh ti ot khaing paox tix. Dee gwieh Mon mai La (Vax) paox tix an, kok ka Mon La Myaing kah, jhak heue, ceukaux an lih ti mawh Maw La Myaing hoek tom singaix yam in. Khaix hoik gwieh mai ceu pui Mon, ceu pui Vax tiblah haok plak taoh rawm Sikrong mai dux ot daux haktiex Cingtong.

Yam ceu pui Vax ot daux haktiex Cingtong, kheu yuh kix naing mai pui tang ceu, jao som kix naing, to tix mox ti ot haktiex caong ma lhaong meung Shiem, tiblah plak haktiex Hawx, tiblah hu tang dah mai tiblah dee pa ang pui hiex hoek dee koe gawng lua lhaong khankix heue. Otkhaix ang lai ot daux dee mox tix, mai sum nyiex yaong dee rawb rim ot

tix heue. Ceu kaux pa lih khaing dee mox kienie plak lox Vax mawh "Sikang lih" heue. Dee bleeh nawh mawh "lih khaing dee pa Sikang" heue. Yam lih khaing dee mox tix, kheu kix lhat ka pui koeng kix tawng mai plaux kix, kheu mawh tix, ceu pui Vax, jao an, phan ceu pui tang ceu chawk kix, kix ang lai ah mawh pa tokaux tix ceu pui Vax, viang mawh nan, kix deeh loh ceukaux pa tokaux ceu pui tix mawh Luax, Tom, Veux, Raok, Ang, Plang, Ien, Ceem, Tao mai Lax heue.

Yam in, dee plak nie pa ot ceu pui Vax an (10) ceu kienie

### 1. Luax

Daux meung Thai, Luax ot daux veng Chiangmai Lam Pang, Moe Hong Son, Utaithani, Supanbari mai haktiex Tak (Tak Province) heue. Plak nie ot daux yaong Boaluang, mai haktiex Hod mai haktiex Chiangmai heue. Ceukaux kok Karapaing ka kix mawh " Lua (or) Lawa " heue .

\* (or) = phan ang mawh nan , \* (a) = phan ang mawh nan

### 2. Tom

Tom khankix koe plak haktiex kawn nyhah lhax lai heue. Ceu Pui Shiem kix kok San Tom ka kix heue.

### 3. Veux

Kok Veux (a) Siviex ka kix heue. Kix koe plak haktiex Vax leun, Yaong Rang, mai Rang Maw Leun heue.

### 4. Raok

Kok Pa Raok ka kix heue. Kix plak nie ot daux meung Hawx. Kix ot ceex daux meung Man. Yaong Raok, Man Tun Man Te, Yaong Soi, Ang Krak mai Nawng Plaux kix mawh Pa Raok heue.

### 5. Ang

kok La Ang ka kix. La Ang khankix ot plak lih singaix, caong ma lhaong mai caong ma seh meung Shiem heue. Ceu pui Vax kok La Ang ka kix. kix kok Tax Ang ka pa tokaux ceucad tix heue.

### 6. Plang

Plang ot daux haktiex rawb rim Cing Tong, meung Yang, dex dee mee meung Lao mai Man, mai ot ceex daux meung Lao heue.

### 7. Ien

Ex yaox kix ot rawb rim Cing Tong, meung Yang mai meung phyiet heue.

### 8. Ceem

Kok shiem Ceem ka kix heue. Ex yaox kix rawb rim Cing Tong, meung Ngien, meung Ka mai meung Pawx heue.

## 9. Tao

Kok Sam Tao ka kix heue. Ex yaox kix dauw rawb rim meung Phyiet, veng meung Phyiet, sinax Cing Tong mai meung Phyiet, rawb rim meung Pin, mai dex dee mee meung Lao heue.

Yam num khraox ceu pui Vax, yam been yungyi ceu pui Vax Cing Tong kok Plang, Ien, shiem Ceem mai Sam Tao yuh pwie (Poi) num kraox tau, mai kix kawx hoek ti viex tau. Plak nie ceu cad an kix ih li Buddah heue.

## 10. Lax

Kok Loi Lax ka kix heue. Ex yaox kix rawb rim veng Pang Long, Na Vi, Meeik Khauh Yaong Vah mai veng Tangyan, haktiex Tangyan plak Loi Maw, veng Ngeen, mai Yin Phan.

Daux ceu pui Vax 10 cub pa koe plak piang mawh ngie ceucad Tom mai Veux ngie pa ih li been kid kaing, mai ceucad tang ceu 8 cub pa kawm deuk ang ih mai ang shiao ka been kid kaing. Been kid kaing an, kuad nyiex simiang yaong ang ah, cao kaing kakoiye kix ang ah, mai cao kaing beenli ang ah tieb sipie sipie. Tax Tang pa mawh cao kaing ra kaux tix kaux dauw yaong Brex pa hoik kid kaing jung pui (57) kaux, tik ka been kid kaing an ka ang nyang naog 1970 num heue. Daux 1976, Ba Ka Pax pao lox mai ah nin "Ang lai pon kid kaing jung pui." Kheu kix pao lox yuh nan, been kid kaing dauw meung Vax, tom lih ti grai hu heue. In mawh bwanson pa yuh Ba Ka Pax son ex.

## K. Grawng Kid Kaing Pa Krai Kuad Vax Dix

Daux haktiex Vax didix, Tax Ri mai Tax Rong, kiex khawm puxaik ra kaux mawh simiang ceu pui Vax. Yam an, yaox ti kharhaum dauw kaing ma, kheu phon tiex ang hiex mhawm, gawng lua kawx kied nie, kied caox priex klawng, ang lhiex hiex lih, mai ang rawm hiex koe, jao an, nghox yhawm ti hu mai krax yuh lai gee kawx ang mhawm ti yuh, pie simie nghox koi kawx yaox ti tah ti ih. Dee goig, nghox pa koe kix tom uik. Jao an, kix yaox ti hu mai liag ka simie nghox ka ceu pui Hawx pa mawh ceu pui tang ceu, pa ot rawb rim tix heue. Ceu pui an kix, ang een rhawm rah piang ceu pui Vax, kix coh nghox pa hoik pleuk (ngaik) mai pa hoik heuk ka koek. Ceu pui Vax kawx ang tawng mai liag ka simie nghox an, jao an, nghox liag ceu pui Vax kix ang kuah heue. Kheu nghox liag kix ang kuah mai yam baox hu liag nghox, ceu pui Hawx deeh baox coh ka nghox pa klao ka nghox pa hoik pleuk (ngaik) mai nghox pa mhawm tau. Yam ceu pui Vax sum simie an, nghox kuah tibbleh, ang kuah tibbleh.

Baox ti bawg, ceu pui Vax deeh mhaing ti liag simie pa mhawm. Bawg in, ceu pui Hawx kix ah nin "Grawng pa mawh in, kheu ang pex tan lu ka phi, nghox pex tom ang mhawm, phan pex kid kaing jung pui tawx ka phi, nghox pex tag mahwm." Grawng pa simie ceu pui Hawx kix kienie mawh sonsang ang ex ih rhawm paox tix mai son sang yhawm sipie sipie jung pui ex kheu kid ex kaing paox tix

heue. Khaix hoik kid Vax kix kaing jung pui, ceu pui Hawx tom deeh tawx simie pa kied mhawm. simie nghox an kawx lih ti kuah mhawm mai lih ti pon nie. Mawh kheu nan, ceu pui Vax lih ti yumrhawm phan kid kaing jung pui tag pon nghox tom nie heue. Baux ju tix ju hoik tix ju, kuad kix ah nin "Jah tom singaix an, been kid kaing, lih tix koe."

### **Kh. Grawng Krax Ot Krax Koe Ceu Pui Vax Baux Ju Kid Kaing**

Been kid kaing, jah ti num mawx ang yaox ti tawng mhawm mhawm. Viang mawh nan, gawng baux ju an, ex yaox ti tawng krax ot krax koe kix.

Yam an dix, ceu pui Vax kix khrawm ti ot tau mai sum veng ting yaong ting, awm pa koe ceucad tix. Daux yaong tix yaong koe lhang nyiex 400 hoek tom 1000 haoh. Phan kawn simex keh loe kaux, coca ti liag nad loe pang. Kix liag nad ka ang nyang liag krak, moi son yuh ka nie mai ma. Yam hu daux nie ang ah, ma ang ah mai hu krax ang ah, viex nad mai tix. Yam it kawx deuh nad mai vaig dee kaing gaong it tix. Deuh ka vaig ra mu, tix mu son sang soh ka ma, pa deuk tix mu an mawh son pui koeng mai yaox ti cied vaig ku ngaix ku ngaix.

Ceucad pa ih been kid kaing kienie kid ngie kaing pui koeng. Kix yumrhawm phan kix kox kid kaing pa ang mawh pui koeng kienie tag yaox ti kham krax kharhawm kharhi daux krax ot krax koe. Pui pa koe mau khankix liag kaing pui koeng

tom hoek mau priem 300 plah. Kix tawx mau cang ka pui kid kaing tix kaux (a) ra kaux mai tat ngawh awm pa pon kaing pui ting, sibun, mai kawn iak heue. Phan pon kaing jung pui, cao mi liag mai yuh poi (pwie) ting, plaux krak (a) moi (10) mu tom hoek (30) mu. Pui yaong khankix gauxrhawm, mai tah kawng, mai klawng mawng mai rieb ka pui pa pon kaing an awm hoek simiang tix kaux. Pui pa kid kaing, plak nie, kix jhawm ti puing (a) kid ka jung pui pa sang teei nawh kaing ka vaig, khaix an, kid ka kaing pui yum an, viex hu heue. Yam kid kaing kawx yaox ti kid tix bawg khaing kieh dud. Kix yumrhawm phan yaox ti kid ra loe bawg ang mhawm. Kheu jao an, kix yaox ti klaing vaig viex tix mhawm mhawm mai lawm lawm heue. Mai kix jhak pa loid pa mhawm jung pui, phan ang loid ang mhawm kix ang teei kaing. Viang mawh nan bawg blah ang lai laug. Kheu yaox cao tiem lai ka pui kid kaing tix kaux nhaox pa hoik kid kaing jung pui ra kaux. Nawh ah nin" Yam nyawm ju aux, yam aux hu kid kaing, aux yaox pui tix kaux pa mox piang khaox ka yix heue. Aux yaox nawh, nawh ang yaox aux, aux puing nawh ka nad pa viex tix, tom krox, dom mawx dom an, nawh rau khaing piang khaox, yum pi heue. Yam yum pi nawh, aux lawd vaig viex tix mai kid ngawng nawh kheu ang vaig aux lawm mhawm mhawm, aux yaox tix kid loe pon bawg heue." Pui Pa kid kaing kix, yam kix laug pui kid kaing, daux kix, kix laug pui pa kuarhawm, pa phai, pa lied, pa lhak mai pa congrhawm heue. Bawg blah kheu yaox ti mawh pui jhaw, bawg

blah kheu yaox ti deeh to plak khaix tix, kheu leue pui yaong ka kix heue. Pui pa kid kaing khankix ang kid kaing jung pui pa ot rawb rim yaong tix, viang mawh nan kid ka kaing jung pui pa ot yaong dee singai khaing tix heue. Ceucad kid kaing awm chix yuh paox pie mai paox tix, mai ceucad kid kaing mai ceucad pa ang kid kawx chix yuh paox pie mai paox tix heue. Yam puing naing kawx chix teem paox tix heue. Daux ceucad pa ang kid kaing, phan pui kid kaing pon kid ka kaing kix tix kaux kaux, ceucad pa kid kaing pa yuh paox pie mai kix, deeh hu mai pawk bix ti kid kaing ka kaing pui koeng ankix heue. Phan ceucad pa ang kid kaing pon giex pui pa hoek kid kaing tix kaux kaux, kix deeh kid kaing kaw an mai sipaung ka kaing nawh mai to yum nawh tau heue.

Pui kid kaing hoek mai cub mai caw ang mawh, viang mawh nan hoek tix kaux ra kaux ngie mai jawm mai puing ka jung pui ka nad pa viex tix mai kid ka vaig mai viex kaing kaw an mai tik ka to pui an dee an. Pui tiblah shiao vaig ngie heue. Yam yaox ka pui koeng kix , kid kaing pui yaong tix kaux kaux, tom sauxrhawm mai pawk bix tix hu mai cub mai caw, dee koe yaong pui koeng an heue.

Yam pui kid kaing kix hoek kid kaing daux yaong, pui yaong kix kawx deeh puing ka pui kid kaing ankix heue. Yam cao yaong leue ti puing ka pui kid kaing, kix tiblah chix deeh taong ka jhaw lom daux krax to pa tokaux tix heue. Pui kid kaing kix hawt ti sawg kaing pui pa hu lai ling

krax, pui pa yuh ma, kaung, pui pa hu lah (5) ngaix tix bawg, ang joeng mawh, hoek daux yaong khawm heue. Bawg blah pie daux poi (pwie) pui koeng khankix, kix kid kaing kawm nyawm iak daux poi (pwie) an mai viex hoek mai yaog min tix jao pon yuh tix, ceu an heue.

Ceucad tiblah, yam ang kix pon kaing ang ah, yam cao kid kaing ang koe daux yaong ang ah kix yaox ti hu liag kaing jung pui daux yaong tang dah khaing pui pa coh ti ih kaing jung pui heue. Daux ceucad tiblah, kix ang hu kid kaing, hu liag ngie kaing jung pui pa kroh heue. Yam liag kaing jung pui yuh nan ang liag ka kaing im jung pui, viang mawh nan, liag ka kaing pa hoik kroh heue. Grawh grawng nawh, paox nyiex paox ma kaing im an tix kaux kaux (a) ceucad kaing im an tix kaux kaux, phan yaox kaing im an kheu chix lih ti mawh naing sivai, mai chix lih ti mawh krax pawk bix heue. Yam liag ka kaing jung pui an, nyiex ma ku nyiex ku nyiex pa koe daux yaong an yaox ti tawx mau ngawh jum kaing jung pui an ku nyiex ku nyiex heue. Phan kaing pa liag (a) kaing pa pon mhawm, kix ce yuh nin, daux yaong kied nyawm ti ot, lai gee kawx kied nyawm ti yuh, nie ma kawx kied lih nghox koi, jhawm saux jhawm ngia kawx ang koe, mai priex klawng kawx kied mhawm ti mie nyao phao heue. Phan kaing pa liag (a) kaing pa pon ang mhawm, kix ce yuh nin, daux yaong ang nyawm ti ot, lai gee kawx kied nu ti yuh, nie ma kawx ang nghox koi, ma hiex lih, jhawm saux jhawm ngia kawx kied nie daux yaong, mai priex klawng kawx kied

caox heue. Yam baux ju an, yam hu krax ang ah, yum sawg mau khri ang ah, yam hu daux nie daux ma ang ah mai yam hu lah phwan ngaix tix bawg ang ah, yaox ti khrawm ti hu tau tom hoek koe jung pui 30 kaux hoek 40 kaux haoh heue. Yam lai ling ti hu yuh nan, plak ka (voe) mai plak khaix (krie) yaox simex ti ot mai hu tau heue. Lawng yaong ang ah, mai siviex yaong ang ah yaox ti yuh kaux kaux cong cong heue.

#### **Ng. Dee Bleeh Rung Krak**

Jah tom ju tax, yiex, mie, keeing ex didix, rung krak mawh been yunngyi pa kied mhawm pa ang ex pon tat ngawh jum heue. Daux poi (pwie) pa tawx ara simiang khankix, jhi yaox ka rung krak pa ngaing, pa lang, pa vieh, mai pa mhawm daux pa koe min. Ceu pui Vax ex khankix kied moh ti plaux krak yam simiang kix yuh sijax mukheu mai paox tix ang ah, yam kum kah grawng ih rhawmrhi khri mau tix ang ah, yam poi (pwie) haok nyiex khraox ang ah, silah mau khri ang ah, yam poi (pwie) yaog min lien yam pex kix naing ang ah, yam yuh kaing tau ang ah mai yam ih rhawm rhi khri mau paox tix ang ah heue. Yam tat ngawh jum kawn sinaw mai bun krix kawx shiao ka krak. Daux nyiex yaong tiblax, phan miex keeing yum tix kaux kaux, jah tom kawn simex pa ting pa mawh kawn ai hoek tom puxaik pa iak nyi, sam, sai pa dia yuh nan, yaox ti plaux krak, yuh krax hu miex keeing tix, mai ang pui mawx pon cax paox tix. Mawh kheu nan krak kienie ang koe ang chix mawh pa ting ceu son ceu pui Vax heue.

#### **4. Grawh Grawng Lai Vax Khankix**

Piang haktiex, krax pa chix pingnya cuyi, krax pa ting lhaong krax ot krax koe, krax pa haok huan plak kuceu cie ceu pui tix ceu kienie num tom nie piang chix lai mie ding mie dawt mai mhai ti deuh pingnya cuyi daux lai mie ding heue. Pui tix kaux awm dong gua pa pon mhai nawh, pon mhai ngie daux tix yieh son phwan son (5%) tom hoek tix yieh son tix nga son (20%) heue. Tix yieh son tix phwan son (50%) kienie pon chix tawng daux lai heue. Daux tix yieh son, pa kawn deuk an, chix pon daux pa tawng pa yung, pa yaox mai pa hoik yuh khankix heue. Jao an pingnya cuyi kienie kheu num tom nie piang pa chix lai, simiang haktiex khankix ang ah, cao kaing beenli ang ah, cao kaing cao kap nyiex yaong ang ah, yaox tix tawx riang tawx rao ka son sang chix lai daux meung tix heue. Ceu pui Vax pa chix lai koe ngie tix yieh son kao son (10%), mai pui pa chix lai pa tokaux ceu pui tix, koe ngie tix yieh son ra son (2%) greem heue. Lai tix pheem, yam sawn mai cied, ah nin, pui pa chix lai daux ceu pui Vax, koe ngie tix yieh son tix son greem heue. Mawh kheu nan son sang chix ex lai kukaux, ex caw ti coca kukaux heue.

Grawng pa ang lai vax haok huan mai grawng pa kied tux tak chix ex lai vax kienie ....

- (1) Viang koe ping nya kawx ang koe mau khri.
- (2) Viang koe mau khri kawx ang koe ping nya.
- (3) Mawh kheu ang ex pon khrawm ti yuh tau.

- (4) Mawh kheu ang ex pon khrawm ti yuh mai ceu cad mawx ceu cad an mai cub ku cub.
- (5) Mawh kheu ang ex ih rhawm rhi khri mau paox tix.
- (6) Kheu ce lai vax mawh lai khrityan nong nong.
- (7) Mawh kheu ang cao kaing beenli kix chix mhawm mhawm, tibbleh ang chix, mai ang kix ma hiex tawx riang rao.
- (8) Mawh kheu ang cao kaing cao kap nyiex yaong kix chix mhawm mhawm, tibbleh ang chix, mai ang kix ma hiex tawx riangrao.
- (9) Mawh kheu ang ex pon plih lai vax ex tom nie ceu.
- (10) Mawh kheu simie ex ti tiem awm lox daux yaong ceucad ex heue.

Lai vax yaox koe loe ceu daux meung loe meung pa kied tang mai paox tix. Inkix kienie.

### **K. Lai Vax Pa Shiao Daux Meung Man**

Daux 1910 num, Tax Ai Rong pa jah ti rieb ka beenli khrityan daux ceu pui Vax, coca ti yuh ka lai vax awm tiem lai shiem heue. Nawh tiem ka camlig mai lai rhax khankix, mai gau kawnyawm kah heue. Viang mawh nan viang nawh coca ti yuh lai vax son ceu pui tix kawx, lai shiem kheu ang pon tiem lox vax grum grum naog naog, tom ang lih ti haok huan heue. Kheu kied tux iak pui pa yumrhawm ka beenli khrityan, yam yuh nawh ka lai an, lai an tom ang lih ti vieh va heue. Daux 1908 tom hoek 1930 num, yam yuh satsana, shiao

ka lai shiem mai lox vax tau heue. Daux 2010 num, pa hoik luan loe num nhaox, cao tiem lai yaox ka pui tix kaux pa hoik koe ju(70) num heue. Yam kum kah mai nawh, nawh krai, grawng yam nyhawm ju tix, grawng yaox ti ah lai rhax ting plak lai rhax lox shiem, mai baox krai grawng yaox ti gau lai shiem, mai Rev. Sam Pleek Nap pa mawh Tax lih cao tiem lai in kawx, tiem lai plak lai shiem ka grawng pa ting ceu khankix daux phuk lai nawh pa koe daux tawm taix cao tiem lai in heue. Jao an, jah 1908 num tom hoek 1930 num, daux beenli khrityan, ex yaox ti tawng kied shiao ex lai shiem mai lox shiem. Daux 1910 num, Tax Ai Rong pa jah ti rieb mai yumrhawm ka Simiang Yesux Khrit daux ceu pui Vax kheu coca nawh ti yuh lai vax plak lai shiem, jhak heue, sivoe 1908 num kawx lai shiem mai been yungyi ceu pui Shiem kied laig ti vieh va daux ceu pui Vax ex heue. Tom hoek 1962 num, daux meung Mau pa mawh veng ting tix veng, daux ceu pui Vax ex, daux cawng gau lai, yaox ti gau lai shiem heue. Khaix 1940 num, kheu hoik yuh ti koe lai vax, kawm khrit khankix ang lai shiao lai shiem viang mawh nan deeh shiao ngie ka lai vax nong hoek tom yam in heue. Viang mawh nan hoek tom yam in, yam tiem lai vax ang ah, yam rawg bwan ang ah, son sang sidawng ngai lai vax ang ah, son sang nie lheu tawng pui kukaux ang ah, son sang koe dee bleeh dee raux dee mox ang ah, shiao lox shiem mai lox vax tau heue.

**(1) Lai Vax Prim**

Daux 1930 num, cub satsana kawn khrit khankix, yam lih hu kix ti yuh satsana ku dah ku dee, kix mhai lox sikah ex ku yaong ku yaong mai yuh lai vax plak lai Romax son mawh pa khaw mai pa kied dex mai lox sikah pa shiao ceu pui Vax son ceu pui Vax heue. Phuk lai gau lai vax kawx pon thut (plih lih) heue. Cao pa yuh lai Vax mai phuk lai gau lai vax mawh Rev. Vinsinyang mai moeng nawh Virayang pa yuh satsana, mai sara vax kix pa kaux Rev. Yawsuxchin, Rev.Sam pleek Nap, Sara Ai Pao, Sara Ngox Meung, Sara Nyi Seu, mai Rev. Sam Pleek (Cing Tong) heue.

**- Miex Lai (26) Mu**

|   |    |    |   |    |    |
|---|----|----|---|----|----|
| K | HK | NG | S | SH | NY |
| T | HT | N  | P | HP | M  |
| Y | R  | L  | V | W  | H  |
| C | CH | D  | G | B  | F  |
|   |    | J  | Z |    |    |

**- Kawn Lai (13) Mu**

|    |    |    |    |    |
|----|----|----|----|----|
| A  | E  | EH | AW | OI |
| AO | AU | AI | I  | O  |
|    | U  | Ui | EU |    |

**(2) Lai Vax Khraox**

Jah tom 1991 num, cubcaw ting pa yuh lai vax pa ot daux

meung Man, kum kah tau, mai daux 1994 num, tom pon thut lih phuk lai gau pa mawh lai vax khraox, mai rhoi ti tawx ku yaong ku veng son ceu pui Vax heuc. Daux lai vax khraox an, koe miex lai (28) mu, mai kawn lai (13) mu heue. Lai in, yaox deeh cox ceeix ka lai vax pa prim heue. Lai vax khraox in, yam phat ang ah, yam tiem ang ah yie khaing lai prim. Lai vax khraox in , koe miex lai (28) mu, kawn lai (13) mu, plak lai Romax awm plak green heue.

**- Miex Lai (28) Mu**

|   |    |    |   |    |    |
|---|----|----|---|----|----|
| K | KH | NG | S | SH | NY |
| T | TH | NG | P | PH | M  |
| Y | R  | L  | V | W  | H  |
| X | C  | CH | D | G  | Q  |
|   | B  | F  | J | Z  |    |

**- Kawn Lai (13) Mu**

|    |    |    |    |    |
|----|----|----|----|----|
| A  | E  | IE | AW | OI |
| AO | AU | AI | I  | O  |
|    | U  | EE | EU |    |

Yam jah, daux miex lai (28) mu, viang sau ka "Q" kawx, plak khaix, kheu miex ngai an ang lo, yaox ang lai shiao heue. Miex lai (28) mu mai kawn lai (13) mu pa koe plak piang kienie tiem ti deuh awm pa koe daux phuk lai gau Vax, pa thut lih daux 2000 num heue. Daux phuk lai pa thut lih khaix, dee ot miex lai deeh loh ceeix viang mawh nan



dee ot kawn lai ang lai loh.

Lai khraox in, simiang Vax plak nie, khaw rhawm mai rieb mai kieh ex gau daux cawng gau lai khawmuik, daux veng daux yaong pa koe daux meung Vax heue. Mawh kheu nan, li kawn khrit, li Buddah mai li Tawx Mhak khankix, yaox ti gau khawmuik heue. Ceu in mawh satang pa mhawm pa ang ex pon tat ngawh jum, son ceu pui Vax ex khawmuik heue. Lai vax mawh lai son ceu pui Vax khawmuik, mai cao yuh ngai lai khankix kawx ang doh keud ti yuh son li tix ceu ceu ngie. Ka dix, lai vax in, kheu ce mawh lai khrityan nong nong, mawh pa laux rhawm son ceu pui Vax ex, tom hoek yam in heue. Pui tix kaux kaux pa ih li mawx ang ah, tiem mai thut lih lai, grawng li kawn khrit ang ah, mai grawng li pa ih tix ang ah, plak ngai lai pa shiao meung tix, mai ceu pui tix ngie heue. Ra ceu tix ceu grawng pa laux rhawm ex kienie ceu pa simie ti tiem lai vax awm lox ot yaong tix heue. Ex khaw ti gau mai tiem ngai lai pa hoik dawg koe mai pa tawng pui hun daux lai vax ex heue. Phan lai vax mawh tix ceu khaing, koe bwanson son yam siteo ex, tix yaong mai tix yaong ang ah, mai son grawng jhi ex, pui yaox krax ih rhawm rhi khri mau ex ang ah heue. Ceu pa lauxrhawm ex loe ceu tix ceu kienie ex gau tix chix lai man, lai shiem, mai lai hawx mhawm mhawm, viang mawh nan ex ang simie ti gau ti chix lai vax pa hoik dawg koe heue. Ex ang tawng ti phat, ang chix phat, ex chix ah nan heue. Simie tix kieh ex tawng kukaux, jhak heue, hoek tom yamin cao tiem lai in, nawh mhai mai gau ka lai vax, mai lox vax pa ang nawh chix khankix heue.

### Kh. Lai Vax pa Shiao Daux Meung Hawx

Ceu pui Vax pa ot daux meung Hawx, shiao ka lai vax prim, hoek tom 1980 num heue. Viang mawh nan, hoek tom yam in kawn khrit pa ot daux meung Hawx, kawn shiao ka lai vax prim daux lai rhax ting awm meung Man. Daux 1980 num, kix ang lai shiao ka lai vax prim mai yuh mai thut lih ka lai vax pa khraox, mai phuk lai gau pa khraox heue. Lai vax khraox an, awm ngie lai romax daux lai vax pa prim, viang mawh nan, lox ngai lai pa lih lox, dex loh uik heue. Lai vax khraox pa koe daux meung Hawx, koe miex lai (26) mu, mai kawn lai (13) mu heue. Lai ankix mawh awm plak greem heue.

#### - Miex Lai (26) Mu

|   |   |   |   |   |   |   |   |   |   |   |   |
|---|---|---|---|---|---|---|---|---|---|---|---|
| a | b | c | d | e | f | g | h | i | j | k | l |
| m | n | o | p | q | r | s | t | u | v | w | x |
|   |   |   |   | y | z |   |   |   |   |   |   |

#### - Kawn Lai (13) Mu

|   |   |   |   |   |    |    |    |    |    |    |    |    |
|---|---|---|---|---|----|----|----|----|----|----|----|----|
| a | e | i | o | u | ei | ie | ee | ou | ai | ae | ai | oi |
|---|---|---|---|---|----|----|----|----|----|----|----|----|

Viang mawh nan, daux phuk lai pa gau kix, lheu shiao mai gau, kawn lai (9) mu, ankix kienie mawh " a, e, i, o, u, ei, ie, ee, ou " heue. Daux phuk lai gau kix kawx shiao ngie lai romax lai iak awm plak piang heue.

(1) Pakpeung Tiag Ka Lai Vax Khraox Pa Koe Daux Meung  
Hawx Mai Lai Vax Khraox Pa Koe Daux Meung Man.

(K) Pakpeung Tiag Tix

| Lai Vax<br>Meung Hawx | Lai Vax<br>Meung Man |
|-----------------------|----------------------|
| b                     | p                    |
| p                     | ph                   |
| nb                    | b                    |
| np                    | b                    |
| m                     | m                    |
| hm                    | m                    |
| f                     | f                    |
| v                     | v                    |
| hv                    | v                    |
| d                     | t                    |
| t                     | th                   |
| nd                    | d                    |
| nt                    | d                    |
| n                     | n                    |
| hn                    | n                    |
| l                     | l                    |
| hl                    | l                    |
| r                     | r                    |
| hr                    | r                    |
| j                     | c                    |
| q                     | ch                   |
| nj                    | j                    |

| Lai Vax<br>Meung Hawx | Lai Vax<br>Meung Man |
|-----------------------|----------------------|
| nq                    | j                    |
| ny                    | ny                   |
| hny                   | ny                   |
| s                     | s                    |
| y                     | y                    |
| hy                    | y                    |
| g                     | k                    |
| k                     | kh                   |
| ng                    | g                    |
| nk                    | g                    |
| ng                    | ng                   |
| hng                   | ng                   |
| h                     | h                    |
| i                     | i                    |
| im                    | im                   |
| in                    | in                   |
| ing                   | ing                  |
| ib                    | ip                   |
| id                    | it                   |
| ig                    | ik                   |
| ix                    | ix                   |
| ih                    | ih                   |

| Lai Vax<br>Meung Hawx | Lai Vax<br>Meung Man |
|-----------------------|----------------------|
| im                    | im                   |
| in                    | in                   |
| ing                   | ing                  |
| ib                    | ip                   |
| id                    | it                   |
| ig                    | ik                   |
| ix                    | ix                   |
| ih                    | ih                   |
| ei                    | e                    |
| ie                    | ie                   |
| a                     | a                    |
| o                     | aw                   |
| ou                    | o                    |
| u                     | u                    |
| e                     | eu                   |
| ee                    | ui                   |
| ai                    | ai                   |
| aing                  | aing                 |
| aig                   | aik                  |
|                       | ait                  |
| aix                   | aix                  |
| aih                   | aih                  |
| ao                    | ao                   |

| Lai Vax<br>Meung Hawx | Lai Vax<br>Meung Man |
|-----------------------|----------------------|
| aong                  | aong                 |
| aog                   | aok                  |
| aox                   | aox                  |
| aoh                   | aoh                  |
| ae                    | au                   |
| aeng                  | aung                 |
| aeg                   | auk                  |
| aex                   | aux                  |
| ach                   | auh                  |
| ua                    | ua                   |
| uan                   | uan                  |
|                       | wan                  |
| uang                  | wang                 |
| uad                   | uat                  |
|                       | uwat                 |
| uag                   | wak                  |
| uax                   | wax                  |
| uah                   | wah                  |
|                       | uah                  |
| uai                   | uai                  |
| ui                    | wi                   |
|                       | ui                   |

| Lai Vax<br>Meung Hawx | Lai Vax<br>Meung Man |
|-----------------------|----------------------|
| uing                  | uing                 |
| uig                   | uik                  |
| uix                   | uix                  |
| uih                   | uh                   |
| oui                   | oe                   |
|                       | we                   |
| ouing                 | oeng                 |
| ouig                  | oek                  |
| ouix                  | oex                  |
| ouih                  | oeh                  |
| oi                    | oi                   |
| oing                  | oing                 |
| oig                   | oik                  |
|                       | oit                  |
| oix                   | oix                  |
| oih                   | oih                  |
| eui                   | eue                  |
| eei                   | eei                  |
| eeing                 | eeing                |
| eeig                  | eeik                 |
| eeix                  | eeix                 |

| Lai Vax<br>Meung Hawx | Lai Vax<br>Meung Man |
|-----------------------|----------------------|
| eeih                  | eeih                 |
| ia                    | ia                   |
| iam                   | iem                  |
|                       | iam                  |
| ian                   | ien                  |
|                       | ian                  |
|                       | iiien                |
| iang                  | iang                 |
| iad                   | iap                  |
| iad                   | iet                  |
|                       | iat                  |
| iag                   | iak                  |
| iax                   | iax                  |
| iah                   | iah                  |
| iao                   | iao                  |
| iog                   | iawk                 |
| iou                   | io                   |
| iu                    | iu                   |
| iei                   | i-e                  |
| iie                   | iie                  |

### (Kh) Pakpeung Tiag Ra

Son sang pon tawng cao phat lai in ka grawng pa tang lai vax pa koe daux meung Man mai pa koe daux meung Hawx , cao tiem lai simie ti tiag ex yaox pakpeung awm plak greem heue. Inkix, mawh pa teei lih khaiing ngai lai pa koe daux phuk lai gau pa thut lih daux 1980 num, daux meung Hawx, mai ex yaox kix num piang lai Makux 4:3-8 pa koe daux camlig khraox pa mawh phuk lai sigang khri pa khraox khriyan, mai kix tiag ex yaox awm plak greem heue. Inkix kienie.....

### - Lai Vax Pa Shiao Meung Man

Nghiet heue, jhak heue, pui rhuat simie hu ti rhuat simie heue. Yam rhuat nawh simie, simie tix blah cod ka dex krax mai sim khankix hoek sut ti ih simie khankix heue. Simie tix blah cod piang tiex dee koe simaox, dee ang tiex koe tom nie, simie an kuah dom mawx dom an, mawh kheu ang tiex raux tan. Yam hoik lih singaix, kied hax koek, kheu ang kix koe riah, kix kroh hu heue. Simie tix blah cod ka sinax pang kat mai pang kat an ting tom kheen gut kix, kix ang chix plix, plix heue. Simie tix blah cod ka dee mhawm tiex mai plix plix heue. Mai kix ting mai piien tom pon tixngoe son, tixgliah son mai tix yich son heue.

### - Lai Vax Pa Shiao Meung Hawx

hngiad heui, nqag heui, bui hruad si mīe hu dix hruad si mīe heui. mai yām hruad noh si mīe, si mīe dīx nblah jōud gah ndēix grax, mai sim kan gix houig sud dix ih si mīe kan gix heui. mai si mīe dīx nblah jōud gah bīang diex ndee goui si māox, ndēe ang diex goui dom nīe, mai si mīe an gūah ndum mox ndum an, mōh kee ang diex raex dan, mai yām hoig lih si ngāix, gted hax gouig, mai kee ang gix goui rīah, gix grouh hu heui. mai si mīe dīx nblah jōud gah si nax bang gad, mai bang gad an dīng, dom keem mgud gix, mai gix ang jīx blix blix heui, mai si mīe dīx nblah, jōud gah hdēe hmom diex, mai blix blix heui. mai gix dīng mai bian dom boun dīx ngoui (30) sōun mai dīx mgliah (60) sōun, mai dīx si yieh sōun heui.

(Ng) Pakpeung Tiag Loe

| Lai Vax<br>Meung Hawx |            | Lai Vax<br>Meung Man |           |
|-----------------------|------------|----------------------|-----------|
| 1                     | dix        | 1                    | tix       |
| 2                     | ra         | 2                    | ra        |
| 3                     | loui       | 3                    | loe       |
| 4                     | boun       | 4                    | pon       |
| 5                     | puan       | 5                    | phwan     |
| 6                     | liah       | 6                    | liah      |
| 7                     | aliah      | 7                    | aliah     |
| 8                     | ndaix      | 8                    | daix      |
| 9                     | ndim       | 9                    | dim       |
| 10                    | gao        | 10                   | kao       |
| 11                    | gao dix    | 11                   | kao tix   |
| 20                    | dix nga    | 20                   | tixnga    |
| 30                    | sam sib    | 30                   | tixngoe   |
| 40                    | si sib     | 40                   | tixpon    |
| 50                    | ha sib     | 50                   | tixphwan  |
| 60                    | hroug sib  | 60                   | tixgliah  |
| 70                    | jiad sib   | 70                   | atixgliah |
| 80                    | bied sib   | 80                   | tixdaix   |
| 100                   | dix yieh   | 100                  | tixyieh   |
| 1000                  | dix hreing | 1000                 | tix rheng |
| 10000                 | dix hmeen  | 10000                | tix mheen |

Ng. Lai Vax Pa Koe Daux Meung Thai

Ex yaox ti tawng ka grawng lai vax pa koe daux meung Thai, hoik yuh ti deuh ka ang nyang bax hoek 1993 num, kheu phuk lai kix heue. Kix thut lih camlig khraox pa mawh camlig khrityan daux 1993 num ka ngai lai in heue.

၁၉၉၃ ခုနှစ် လာဝါ အကျဉ်းချုပ်  
 New Testament in Lwax  
 နေပြည်တော်  
 New Testament © Thailand Bible Society, 1993  
 Thailand Bible Society  
 Box 4-193  
 Bangkok 10496  
 Illustrations © New Tribes Mission, 1989  
 New Tribes Mission  
 1126 East First Street  
 Maitland, FL 32771-1487, U.S.A.  
 ISBN 974-5247-7-5  
 Published and Printed in Thailand  
 LAWA NT/TH 1992 2M

|       |             |       |             |
|-------|-------------|-------|-------------|
| ၁     | ၁၉၉၃ ခုနှစ် | ၁     | ၁၉၉၃ ခုနှစ် |
| ၂     | ၂           | ၂     | ၂           |
| ၃     | ၃           | ၃     | ၃           |
| ၄     | ၄           | ၄     | ၄           |
| ၅     | ၅           | ၅     | ၅           |
| ၆     | ၆           | ၆     | ၆           |
| ၇     | ၇           | ၇     | ၇           |
| ၈     | ၈           | ၈     | ၈           |
| ၉     | ၉           | ၉     | ၉           |
| ၁၀    | ၁၀          | ၁၀    | ၁၀          |
| ၁၁    | ၁၁          | ၁၁    | ၁၁          |
| ၂၀    | ၂၀          | ၂၀    | ၂၀          |
| ၃၀    | ၃၀          | ၃၀    | ၃၀          |
| ၄၀    | ၄၀          | ၄၀    | ၄၀          |
| ၅၀    | ၅၀          | ၅၀    | ၅၀          |
| ၆၀    | ၆၀          | ၆၀    | ၆၀          |
| ၇၀    | ၇၀          | ၇၀    | ၇၀          |
| ၈၀    | ၈၀          | ၈၀    | ၈၀          |
| ၁၀၀   | ၁၀၀         | ၁၀၀   | ၁၀၀         |
| ၁၀၀၀  | ၁၀၀၀        | ၁၀၀၀  | ၁၀၀၀        |
| ၁၀၀၀၀ | ၁၀၀၀၀       | ၁၀၀၀၀ | ၁၀၀၀၀       |

Yam cao tiem lai hu daux veng Mie Sai, meung Thai, son sang pon teei grawng Tax Saw Lux, mai nawh yaox phuk lai gau tix phuk heue. Mawh kheu nan, cao tiem lai viex hoek ceex awm plak greem heue.